

JACOBI van den VELDE

Dr. Med. P.P. in Acad. Marburg. atque SERENISS. PRINCIP.

Hasso - Castellani Archiatri.

DIATRIBA ACADEMICA

Qua

Doctrina Medica

DE

CRISI,

sive

NATVRAE MEDICINAE

purgatur a vanitate & offuciis

DIERVM CRITICORVM

una cum

PARAENESI ad PHILIATRO

MARBURGI CATTORVM,

Apud PHILIPPUM CASIMIRUM MÜLLERUM Acad. Typog.

MDCCXVII.

75

.cl

Mr. J. H. ...
Ed. ...
...

...

...

...


...

...

...

...

...



PARÆNESIS ad PHILIATROS,

De

*Instituto CL. BAGLIVI & aliorum nostræ ætatis
Celebb. Medicorum conantium Medicinam revocare ad
priscam (ut loquuntur) observandi rationem.*



Medicinam suis nixam fundamentis, æque certa, ac ceteras humanas scientias, constare ratione, censent, quot quot sunt æqui rerum humanarum arbitri. Nihilominus tamen compertissimum est, *artem Medicam*, inde ab antiquissimis temporibus ad hæc usque nostra, identidem esse agitatam & interpolatam commentis & *hypothesibus* usque adeo variis & dissidentibus, ut fere non nisi hæctenus inter ea conveniat, quod concepta sint & nata unius ejusdemque indolis quasi matre, *mentis videlicet contemplatione ab ipsarum rerum observatione abstracta, & per generalia principia libere discurrente.* At neque pariter compertum est, neque satis definitum, utrum ulla, & quæ talium hypothesium vero Medicinæ fini sit utilis & accommodata? Fuerunt nostro ævo multi, & sunt in hunc usque diem, multo tamen quam dudum pauciores, & fere finem artis severæ minus respicientes, qui uni aut alteri hypothesi, ut puta *VVillisiane, Sylviane*, aut his nequaquam certiori, ad quam, tanquam ad scopulum sunt appulsi, pertinaciter adhærent; eamque veluti Palladium omnis suæ ar-

Archibald.
Pitcarnius,
Diff. Medd.
I.

tis pugnaciter tuentur. Sunt autem e contrario & alii, multoque, ut equidem arbitror, illis prudentiores, qui animadvertunt, tot ac talibus vagarum speculationum molitionibus ab omni ævo fuisse profectum adeo nihil, ut nil magis scientiæ Medicæ incrementis obstitit, nil magis genuina artis fundamenta concusserit & labefactaverit, quam ipsa hæc fingendi licentia, tantum non Poetica. Atque adeo sunt, quos iusto quasi flagrantibus zelo, audiat exclamare: *non oportere artem illam, quæ una mortalibus promittit sanitatem, conjecturis & somniis involvi; nec prudentis esse, illi vitam credere, cujus rationes plerisque falsæ, paucissimis probabiles videntur.* Igitur ut tot hypothesebus controversis convulsæ & laboranti arti, ipsique adeo medicinæ medicinam faciant nostri ævi Medici, rerum usu & doctrina excellentes, omnem impendunt operam. Eumque in finem imprimis præcipiunt, & hanc veluti legem sanciunt: Medicis nefas esse, pro demonstratione, norma, instrumento actionis haberi aliud quidquam, præter ea, quæ firma & fida observatione constantia, ceu per vera *rerum & factorum* suffragia, hincque subsumtam *inductionem*, neutiquam fallacem, ad intellectum aperte pervenerint. Ea autem, quæ observatione neque pervestigari queant, neque adeo liquere, veluti incomprehensibilia extra usum artis Medicæ esse, & relinquenda disputationibus Philosophorum indeterminandis. Inter eos, qui salutare hoc propositum ab hinc aliquot lustris urere, est *GEORGIUS BAGLIVUS* Romanus, Medicus sagacissimus; eximiam hinc nominis celebritatem, juvenilibus etiam annis, suo merito consecutus. Is excitatus Prudentiorum monitis, & exemplo cum primis *VERULAMII & SYDENHAMII*, mordaci aceto non solum, quos vocant, somniantes opinatores adspersit quasi excitaturus, sed & unâ candide & plene edocet media, quibus perfici ars Medica, & super certis suis fundamentis instaurari queat, edito singulari opusculo: *de Medicina ad priscam observandi rationem revocanda.* Libellus a prima editione Romana & A. MDCXCVI. prelo & in Gallia, & Germania, & Bel-



& Belgio sexies iteratus, est in manu omnium, & communi Medicorum applausu exceptus. Eoque non est nostro indicio locus, qua ratione unice necessarias Observationes instituendas, & usui aptandas præcipiat Auctor Laudatissimus. Hoc solum notamus, ubique *HIPPOCRATEM*, ceu præmonstratorem & ducem unice certum, in observandi via multis difficultatum salebris impedita, proponi sequendum imitandum. Hinc admirandi Hippocratis mira præconia: *Natura non hominis voce loqui Hippocratem; eum quippe nil quidquam opinioni aut conjectura fallaci indulgisse, sed liberum ab omni hypothese & secta Philosophorum, naturam unice consuluisse, eique infinitis experimentis & observationibus investigate, tandem obsequendo imperavisse: hinc tuto credi, ceu firmissima ratione constitutis, decretis Hippocratis; & quæ his sunt similia alia, quæ ceu verba cadentia tollit, & extollit ornamentis Oratoriis & cothurnis Vir de Theoria Medicina solidiore hodieque optime merens.*

Quorum quidem Optimorum Virorum institutum, ut debeo, magni facio, & tanto præstantius judico, quo est hominum vita & sanitas, quam in tuto collocare conantur, potior omnibus fortunæ bonis, nedum phantasiæ ludibriis. Verum enim vero mallem non excidisse, nimio forte animi & styli fervore, tanta Hippocratis, omnem sane humanæ conditionis modulum excedentia encomia; mallem in rebus cujusvis assidui observatoris industriæ obviis, liberam & humana auctoritate solutam industriam; præsertim in tanta luce cultæ tot frugiferis experimentis *Physica, Anatomes, sobriaque & sana Chemia* &c. Denique, ut libere, quod sentio, eloquar, mallem recognitione & censura severiore sigillatim fuisse & animadversa & discreta, quæ sint in ipso Hippocrate probanda, quæ imitatu, quæ vitatu digna, quam promiscue & universe laudata omnia. Enimvero doctrinæ optimæ frugis veluti thesaurum & ego in Hippocrate agnosco; quin & hoc, quod fidei antiquitatis monumentis videtur esse compertum, non voco in dubium, Hippocratem adjutum gentis suæ [*Asclepiada*] observationibus & experimentis, ali-

quot seculorum continua serie institutis, conservatis, auctis, & (quasi hæreditate) per manus traditis: iisque instructum, adhibita summa illa, qua pollebat, solertia & sagacitate, naturæ arcana propius, quam forte suorum decessorum quemquam alium, inspexisse, & intimius esse pertratum: hinc & fuisse primum, qui conformata ad ipsius naturæ ductum nobis dedit præcepta medendi; eaque usque eo firma & constantia, ut & sustinere viginti trium seculorum examen potuerint, & inconcussa in hunc usque diem perdurare.

Nihilo minus tamen & hoc videtur esse compertum, multa Hippocratis decreta esse admodum adhuc cruda & indigesta; uti non est sane unius hominis rem difficillimam & inchoare, & simul perfectam dare. Ad hæc multa exstare universaliter & aphoristice pronunciata, magis ex una aut altera particulari observatione, conjectura, fluctuante traditione, quam ex constanti & confirmata experientia; &, ut est veri non modo simile, sed & facile ex multis locis, imprimis Librorum Epidemicorum probandum, ea ab Hippocrate, dum artem faceret, ceu in ephemerides & adversaria fuisse notata, eum duntaxat in finem, ut sæpius iterata occasione recognosceret ipse, num eadem semper, aut saltem ut plurimum, eodem modo se haberent, an secus; igitur non sane tanti ea, quæ sic adnotaverat, fecisse, aut, quo fuit candore, a suis posteris haberi voluisse, ac si forent decreta & axiomata universalia & æternæ veritatis. Pro quibus si pateremur illa talia nunc demum nobis obtrudi, quæ foret vecordia? Quin immo quis porro non animadvertit? doctrinam utilem passim tum esse adeo ambiguam & obscuratam, forte studio & dedita opera, more antiquitatis; tum alibi sic conspersam & obseptam farragine vel nube variorum, & omnino dissidentium, & manifeste falsorum Philosophematum (prout fuit seculum adhuc rude in talibus) ut sit ubique difficillimum, genuinum & boni succi sensum hinc colligere & secernere. Sic ut hærens quis inter talia ambiguus, forte in scriptis Hippocratis iure vindicem desideret ipsum Hippocratem. Erit forte olim,
Deo



DEO volente, nostri laboris, hæc explicatius disceptare. Nunc solum monemus majore cautione opus esse, ne, quod dicitur, *pro Junone nubem* &c. & in specimen damus Hippocraticam de *Crisi & diebus Criticis* doctrinam; ab una parte certam & utilissimam: quatenus stat ab experientia, & hinc cognitam tradit eam *morborum solutionem*, quæ fit *per motus vitales spontaneos*, seu ipsam *Naturæ Medicinam*; ab altera parte incertam, immo futilem & vanam: quatenus ultra experientiam evagatus Hippocrates, fluctuante sententia, illos ipsos motus salutares adstringere & circumscribere est conatus, stato dierum certorum termino. Erit ergo in primis nostri instituti demonstrare famosi illos *Dies Criticos*, tot seculorum, tot ingeniorum crucēs, non tam constituisse Hippocratem firma & constanti observatione, quam potius, hac quasi repugnante, ex *Philosophia Pythagorea*, eaque male intellecta, subsumsisse & vitiose exputavisse. Hinc illos ipsos *Dies Criticos*, ceu male ortos, ab antiquorum prudentissimis fuisse dudum explosos; Galeni vero artibus Græcis, quasi per postliminium in Medicinam frustra receptos. Atque adeo actum agere Viros nostri ævi Celeberrimos, qui cum Baglivo, *diebus his albis & atris* (ut ipsorum *quidam* argutatur) auctoritatem & pondus denuo addere conantur. Quod si titubans in argumento arduo & perplexo, adferendaque paradoxa sententia, forte alicubi fuero lapsus, veniam, ut spero, merebitur conatus & ingenuus & utilis.





Doctrina Medica
DE
CRISI,
Sive
NATURAE MEDICINA,
purgata a vanitate & offuciis
DIERVM CRITICORVM.

I.



St velut ex magistrorum præscripto ea auctoritas doctrinæ de Crisi & diebus Criticis, ut ceu planissime confectam habeant, & divulgent quivis Systematum Medicinæ Scriptores cyclici. Nimirum jam inde a Galeni temporibus, sine ulla hæsitazione, nedum examine ullo, posteris usque & uique eam sic tradentibus, uti a decessoribus acceperunt. Hanc crambem toties recoctam denuo depromere, nostri neque est stomachi, neque instituti; ut vel ex ipso Lemmate obvium est cuivis arbitrari. Supponens igitur harum pagellarum Lectorem, (utique judicem) doctrinæ vulgatæ gnarum, vel ex quovis systemate erudiendum: quæ inter *Andreae Laurentii & Julii Cesaris Claudini de Crisi & diebus Criticis singulares Libelli* palmam merentur: non nisi ea, quæ scopo nostro necessaria judicavero, proponam. Et quidem, quod mihi ne sit fraudi! libera, atque a scholasticis legibus paullo solutiore, investigatione & animadversione ipsos insecutus doctrinæ Auctores; *Hippocratem & Galenum*; illius, ut ipse videri voluit, & ab omni

ævo habitus est, fidum & scitissimum interpretem. Reperio autem *κρίσις* notionem, uti est *πράξις*, varie & ambigue passim Hippocratem usurpare. Quam ipsam tamen varietatem non consectamur omnem; collectam in unum veluti acervum a *Foesio* in *Oeconomia Hippocratica*, opere summo labore affecto, sed ab Hippocratis amatoribus hodiernis oppido perficiendo. Nostrum est solum exquirere, quo significatu, cum de morbis eorumque mutatione loquitur Hippocrates, *Crisis* notionem utatur. Solet autem fere trifariam. I. Pro *concitato & vehementi motu*, ceu *lucta*, *pugna* nature in morbis contingente: ut *Libr. Prænot. sub fin. ἀτακτὴν, μᾶλλον ἐκφυγεῖν, κρισις δὲ ἀπελευθερίων*. Qui locus, ut jam olim contra *Leoniceum* recte notavit *Langius*, omnino sic vertendus: morbi tranquillitas s. imperturbatio longitudinem significat, *PUGNA* vero, morbi resolutio. Conf. *Galen. de Diebus Decretor. lib. 3. cap. 2.* Hinc scite *Cœlius Aurelianus*: *Passionis atque nature conflictus*, quos *Græci Crisis* appellant. II. Pro quavis, in omnem eventum, insigni mutatione morbi cujusvis, acuti nimirum & *Chronici*, promiscue & indifferenter: ut *Lib. πρὸς Πυθαγόραν, Foes. Edit. Genevens. f. 518. κρισις* in morbis dicitur, *ὅτι καὶ ἀυξάνεται αὐτοῖς ῥᾶσι, ἢ μακρύνεται, ἢ μεταπίπτουσιν ἐς ἄλλαν νόσον, ἢ πελευτῶσιν*, cum morbi augentur, aut marcescunt, aut in alium morbum transeunt, aut finiuntur. Conf. *Lib. 1. Epidem. in fin. sect. 3.* Sicque dicuntur *κρίσις* diuturno demum tempore morbi *Chronici*, *τὰ μέγιστα νοσήματα ἐν πλείω χρόνῳ* uti & recensentur, *Variis Libr. Epid. locis*, morbi centesimo demum die & tardius finiti. III. Pro materiae morbosæ cujusvis tum *secrezione* & *sequestratione*: ut colligere est ex loco notatu dignissimo *lib. de Articul. f. 4. f. m. 832.* tum *excretionem* quavis: sic ut *τὸ κρισις* idem sit quod *ἐκκρισις* excernere, v. gr. *Lib. 4. Epidem. f. m. 1113. τὸ ἐξ ἐν ἐκκριδι*, *Crisis facta per urinam*. Conf. *Lib. de Loc. in Hom. f. m. 48. &c.* Quorum locorum sensum in unam summam conferens Hippocratis sectator, forte hanc posset expromere aut similem definitionem, *Galenica* sane, quam passim adhuc

Lib. 1. Epist.
Medd 37.

Lib. 2. Acut.
cap. 19.

adhuc sequuntur, & pleniorē, & magis propriam, quod Crisis sit :

Incitatio & lucta natura in morbo & contra morbum; quæ, superantibus naturæ viribus, morbus aut salubriter finiatur, aut saltem levetur, plene vel ex parte secretâ & excretâ per congrua secernicula morbosâ materiâ: vel e contrario, superante materia sive quantitate sive qualitate noxia, sic ut natura viribus impar eluctari non possit, morbus aut augeatur aut ipsa vita finiatur.

II.

Quæ definitio, me iudice, plane est ad mentem Hippocratis. Qui humanæ naturæ salutarem potentiam, quam optime agnovit, ubique prædicat; sic tamen, ut sententiis dictione minutulis, at sensu gravissimis, eam intelligentibus potius subinnuat, quam plane edoceat. Ut Lib. VI. Epid. sect. 5. *φύσις* dicitur *ἰατρὸν ἴστωσαν*, *Natura, morborum medicus*; quæ non solum *ἰατρὸν* *ἴστωσαν*, sed & (Lib. de Aliment) *ἡ φύσις πάντα πείσκει*, sufficit omnia omnibus. Hincque natura sponte facit ea, quæ ars consilio: Lib. I. de Diet. Medicina, inquit, quod affligit, abigit, & à quo quis agrotat tollens, sanum facit, at natura hec sua sponte (*ἀντὶ φύσιν πάντα*) novit. Et quidem usque eo natura *πάντα πείσκει*, ea quæ conveniunt facit (Lib. Epid. cit.) ut ars quid facere debeat, nisi naturæ indicio, non norit. Natura quippe est, (Lib. de Arte) quæ stimulata & impulsæ (a causâ morbifica) ostendit artis peritis, quæ faciendæ sunt. Hinc meritissima laus, Hippocrati quam tribuit Galenus: Hippocrates omnium, quos novimus, tum Medicorum, tum Philosophorum princeps, ut qui primus naturæ opera novit, hanc miratur & semper celebrat, iustam nominans, solamque animalibus ad omnia satis esse dicit, ipsamque per se, non edoctam, (*ἀὐτὴν ἡ φύσις, ἀδιδάκτω*) omnia quæ opus sunt agere.

Lib. I. de
Nat. Facult.

III.

Juvat igitur, quoad fieri compendio potest, disquirere, quæ hæc natura adeo concinna, adeo Saluti potens, ista *φύσις*, ex mente Hippocratis, det effectui, quæ luctam contra morbum ineat, eâque debellet. Num forte gnara & metuens

Vitz

Vitæ imminentis a morbo periculi? num ex aliqua rationali deliberatione, ἐκ γνῶσεως, παρασπένσεως, διανοίας, finī convenientia, secernendæ putā & excernendæ materiæ morbi- ficæ apta organa conquirit ipsa, & eligit? Sic sentit *Vir nostro ævo Celebratissimus*; qui naturam hanc statuit esse ipsam animam hominis rationalem. Quam paradoxam sententiam, quo est ingenio præpollenti & admirando, sic concinnavit, ornavit, & numerosis eodem identidem argumento publicatis diatribis sic inculcavit, ut nactus sit passim non solum admiratores & sectatores, sed &, contra secus sentientes, pugnaces & paulo ferociores adsertores. Ipsam hanc sententiam a radicibus subtiliter limare, meum nunc non est, nec erit unquam committi cum illis talibus. Ceterum, quicquid demum de illa sententia fiat, ego verecunde, at ingenue, quod liceat illorum pace & bona cum gratia, profiteor & edico, eam esse præter immo contra mentem Hippocratis. Ut enim is præcipit, (*Lib. Epidem. loc. cit.*) Natura non solum ἀπαίδευτο καὶ ἡ μαθοῦσα τὰ δεόντα ποιεῖ, non edocta, absque disciplina, convenientia facit. Quod quidem, ut reperio, concedunt & largiuntur ultro illi ipsi, qui naturæ γνῶσιν & actionem ex ratione deliberatam tribuunt; negant vero hanc, quam statuunt, rationem per *ratiocinationem*, (ut loquuntur) vel per ideas adventitias accedere, veluti forinsecus; sed esse innatam, & animæ infixam, ceu habitum infusum. Atque adeo animam rationalem, cum (ut volunt) perfungitur operationibus Vitalibus, *rationaliter* quidem agere, & consilio, sed tamen *sine ratiocinatione, sine conscientia* peragere, quidquid agit; hincque hætenus non edoctam, sine disciplina &c. Quam equidem sententiam, suis relictam amatoribus & vindicibus, non urgeo. Sed eodem sermonis contextu porro Hippocrates: ἀνευρίσκει inquit ἡ φύσις αὐτῇ ἐαυτῇ τὰς ἐφ' ὧς οὐκ ἐκ διανοίας, *Natura ipsa sibi per se, non ex consilio, moxiones ad actiones obeundas invenit.* Unde sane, quidquid

B

triceris,

triceris, non alius nisi omnino alienus ab illa sententia sensus constare potest. *Διάνοια* enim quidquid a *ratione* procedit, *intelligentiam*, *consilium*, *voluntatem*, significat; idem quod *προαίρεσις*; & *ἐν διανοίᾳ* agere dicitur homo, in his quæ voluntate, consilio, quasi dicas præelectione, agit. So daß Er aus eigener Willkühr wehlen kan / ob / und wie Er wolle / oder nicht wolle. Immo *διάνοια* ipsa mens, s. anima rationalis dicitur. Hinc scite ad hunc locum Galenus, & liquido pronunciat: *Itinera*, inquit, *nature* ἐφ' ὅδ' ἄς appellavit, perinde ac si *vias* aut *impetus* ad agendum dixisset *naturales*, quæ statim ortis animalibus insunt, quibusque (necessario, ex causis Physicis) id agunt (& non possunt non agere) ad quod agendum nata & conformata sunt: non uti nos, prius mente volventes & prius eligentes facimus. Illo ipso, utique minime ambiguo loco, *Iustus Lipsius* olim inductus est, ut numeraverit Hippocratem inter eos, qui *brutam* aliquam & *sine sensu Naturam* statuebant, *omnia gignentem ac conservantem*. Quo ipso tamen Optimo artis nostræ Auctori insignem facit injuriam. Quippe cuius pius sensus de *Natura*, ut scholastici loquuntur, *naturante*, seu potius de *DEO*, Creatore & Statore rerum omnium, Medicis est perspectus, & a non uno vindicatus. Sic ut mirari subeat, *tantum Virum* ante non advertisse, quam dicam hanc impingeret Hippocrati, eum de *Natura universali* hoc loco neutiquam agere, sed solum de *natura humana*, immo *corporis humani*.

Introduct.
ad Physiolog.
Stoic. Lib. I.
Cap. V.

IV.

Quam quidem, morbos expugnantem & sanitatem præstantem naturam humanam, lubentissime nos cum Hippocrate *οὐκ ἐν διανοίᾳ ἔν' προαίρεσιν* agere profiteamur; quin immo diserte statuimus esse eam *brutam*, *omnisque rationis expertem*: utpote rem *materialem*, nullisque nisi quæ *materiae* s. corpori insunt attributis pollentem. Nihilominus tamen pia mente agnoscimus, hanc ipsam naturam, ad ideam sive normam optimæ rationis, qua ipsa destituitur, & accommodatæ ad finem (sui ipsius conservationem) quem ipsa nec nosse, nedum

nedum intendere potest, esse constitutam infinita Creatoris Sapiencia & Bonitate; Sicque eam, multo sane certius & efficacius, quam potis foret imbellis anima, (si, quod illi volunt, esset motuum vitalium auctor atque rectrix) τὰ δεόντα & posse, & revera agere, quamvis τῶν δεοντῶν prorsus ignara; Perinde atque automata, quæ non pro suo, quod nullum esse potest, sed artificis moventur consilio: Sicque mota, apte & expedite hoc agunt, ad quod sunt ab artifice constituta. Si igitur hanc naturam humanam dixeris artem Creatoris Divinam, in structura corporis humani ad miraculum usque concinna, suisque usibus apta, non peccaveris. Sia vero antiquam sententiam malueris amplecti *Aretæi, Sæctatoris Hippocratis genuini & omnium optimi*, non procul aberis aut a Veritate, aut a mente Hippocratis. Quid vero ille? Loco sane digno, qui non fuisset a nuperis scriptoribus prætervisus, ἡ φύσις, inquit, Lib. II. Cap. I. de Caus. & Sign. A-
 τῶσι σημαίνει, καὶ ὑγρῶ, καὶ πνεύματι, καὶ στερεοῖσι, καὶ τῇ τούτων εὐταξίᾳ, καὶ συμμετρίᾳ, ἐς ζωὴν διέπει τὸν ἀνθρώ-
 πον, *Natura omnibus adest (veluti nutu imperat) sanguini, spiritui, membris; atque horum inter se coordinatione atque commensu vitam homini prorogat.* Rectius vero senseris, si ipsam hanc commensurationem (συμμετρίαν) partium corporis humani, fluidarum & solidarum, atque motuum, qui hinc cientur, vitalium coordinationem (εὐταξίαν) Naturam vocaveris. Sic enim subducto *Phantasmate*, quod tot seculorum ingenia ludificatum est, sub falsa idea alicujus *presidis* aut *re-ctoris functionum corporis*, primum *calidi innati*, mox *spiritus vitalis, animalis &c.* hinc *Archæi*, denique ipsius *animæ, potentiis seu Viribus motricibus mechanicis instructæ &c.* ea de natura humana statues, quæ demonstrari, quæ sentiri, videri, ipsisque adeo manibus palpari possunt; nunquam utique genuino Medico Physico sine anagoge mentis admirantis, Venerantis, adorantis Sapienciam & Bonitatem Numinis infinitam, inexhaustam, ineffabilem.

V.

Hujus nostræ naturæ operationes, ἐφ' ὅδ' ἔστι, organa, quibus & sanitatem præstat, & morborum molitur Crises, diffusiori doctrina exponere, ut est in promptu, sic utique difficillimum, eam compendio complecti luculento: cum vix evitanda brevitati sit obscuritas. Summatim igitur solum id, quod scopo nostro inservit, suppono, ejusque ulteriorem demonstrationem in me recipio: videlicet *sanitatem conservari, & morbos Crisi expugnari, per eadem media, eadem organa, varie solum pro rei exigentia affecta & modificata.* Et quidem potissimum sanitatem præstari, dum jugi & æquabili per partes solidas fluidarum motu, earundem integra servatur fluiditas, mixtio & temperies; recrementa, quæ huic mixtioni & temperiei inconvenientia sunt, eodem motu aut subiguntur, aut, exsoluta & evoluta, ne noxam aut vim teneræ partium texturæ inferre queant, mature auferuntur: hoc est, secernuntur & prorsus e corpore excernuntur, per aptissime huic fini a Divino Plaste constituta secernicula & excernicula. Et quidem illa recrementa, in quæ & alimenta sua sponte facessunt, & humores vitales exolefcunt, ut sunt môle & consistentiâ varia & diversa, sic habent earum quæque, ut indubitatis experimentis Physiologicis constat, sua peculiaris secernicula, & velut emunctoria. *Salina oleosa, subtiliora, volatilia, eaque tenerrime mobilia, & hinc ad interendam σήψιν* i. e. *colliquationem putredinosam* prona, cum aqueo-Vapidis, recepta glandulis & poris cutis, iisdemque secreta, excernuntur ex universo corporis habitu, transpiratione & sudore: *Salsa crassiora, magis consistentia & fixa, acido-salsa, similia omnino sali ammoniaco, acria, corrodentia, dissolventia; per renes potissimum & meatus urine. Pinguis-salsa, spissiuscula, quasi sulphurea, acria, æstuosa, adurentia (καυσικά) per hepar & meatus bilis, in canalem intestinorum effunduntur, una cum scybalis deponenda. Mucida, viscosa, hisque inhaerentia terrea, aut quæcunque alia tenaci coalita in pituitam spissescencia, per tonsillas non solum & reliquas faucium glandulas, sed*

& integrum totum *membrana pituitaria*, & *intestinorum* volumina, fecernuntur & excernuntur. Ab his igitur, & quibuscunque aliis his similibus recrementis depurata humorum massa, & in Lympham roscidam, lubricam, tenerrimamque (quæ decuplum & amplius universi sanguinis conficit) subacta, dum partibus solidis, eadem motuum Vitalium coordinatione æquabiliter suffunditur, & pro rata singulis portione distribuitur, hæ ipsæ partes solidæ nutrimentum ad amissum conveniens capiunt, eoque in decenti structura & conformatione conservantur integræ. Quæ quidem corporis universi integritas, & aptitudo ad obeundas, quibus destinatum est, functiones, quin ipsa sit sanitas, neminem fore arbitror, qui dubitaverit.

VI.

Et quidem istæ secretiones & excretiones recrementorum quasi ordinariorum, per aptissime singulis convenientia fecernicula, nutritio item, cunctæque aliæ corporis sani functiones, solenni & æquabili tenore fiunt coordinatorum motuum: adeoque vigore ut ordinario, sic tranquille procedunt. Morborum expugnatio non item; sed cum intenso plus minus illorum motuum impetu; quem morbifica materia & ipsa ciet atque concitat, quoque & ipsa secretioni est aptanda & excernenda. Mira sane Divini Auctoris Naturæ, hominum saluti ubique consulentis, providentia. Enim vero omnes, quotquot sunt morborum & morbificarum causarum, quæ lucta critica expugnantur, species, singulatim exsequi, materia Voluminis est, non dissertationis Academicæ. Ergo alii occasione relicta tractatione speciali, dicamus summatim, quantum poscit instituti nostri ratio, de illa, quæ & omnium frequentissime & tunc fit, ubi materia morbi universæ sanguinis massæ est suffusa: quod in plerisque morbis, omnis utique generis febribus contingere, extra controversiam est. Si igitur materiæ morbificæ ea sit, quæcunque demum conditio, ut aut mole, aut figura, aut qualitate neque congruat cum mixtione & temperie humorum sanorum; neque conveniat cum meatibus, di-

ametrīs ordinariōrum illorū secerniculorū; atque adeo talis sit, quæ neque admitti intra partium vitalium interiora tuto possit, nec tamen possit ordinaria naturæ vi & energia exterminari; unica sane perniciēi certo imminētis aversio est, præcludere talis materiæ intimiorem aditum, eademque simul actione particulas inquinatas a sanis divellere, & divulsas sic conterere & subigere, *ut formam nanciscantur recrementis ordinariis similem*, aut saltem *convenientem meatibus emuncteriorum ordinariorū*, quibus ab humoribus sanis secretæ exterminentur. Fiunt & hæc ad amissim, si natura suis Viribus præpolleat. Hoc est, quando *fibræ motrices*, ex quibus, ceu originalibus, primis, & præcipuis staminibus, omnes partes Vitales, & quidem serie singulis aptissima (ut docet subtilior nostræ ætatis Anatome) constructæ sunt, nativo tenore, seu iusta tensione, *εὐτογία*, & mobilitate pollent. Quam *εὐτογίαν* & *mobilitatem* (ejus ignorā animā, eamque præstare minime valente) habent ab *actu motis fluidis*: utpote *jugiter & harmonice influente liquore nerveo*, & *interfluente sanguine*; quibus animatæ fibræ motrices, dum in eas illiditur materia morbifica, illarum texturæ & conformationi inconueniens, instar totidem fidicularum, in unam actionem homotonice & æqualiter conspirantium, concutiuntur illæ ipsæ fibræ undiquaque, & vibratæ in renisum contra incongruam, qua tanguntur & feriuntur, materiam, intenduntur: non promiscue tumultuarium, non frivolum, sed exacte, ad *Leges Motus repercussionis* respondentem & convenientem materiæ a qua concutiuntur. Et quidem his *fibris motricibus* cum sit *una origo*, ex cerebro nempe ejusque meningibus: eoque & *una omnium connexio*, & *una* adeo per universum corpus (animadvertente vel ipso Hippocrate) *conspiratio & consensio*; propterea fieri aliter non potest, quin omnia Viscera, omnes partes vitales, in eundem intendantur renisum: adæquatum tamen singularum partium structuræ & conformationi, & omnino convenientem excludendæ
materiæ

materiæ morbificæ. Hinc & cordis & pulsus arteriarum intensio atque incitatio; hinc universæ sanguinis massæ, una cum in-hærente materia morbifica, velocior & impetuosior motus at-que impulsus in partes solidas, illa tensione rigidiusculas; Puta meatus patentiores: intimiores enim, hac intensione constricti, non possunt non sic claudi, ut salubriter excludatur materiæ morbificæ aditus. Quo tali ad fibras rigidiore impulsu & allisu, non potest non fieri valida contrusio sanguinis pressio; ex hac pressione insignis attritus: ex hoc attritu & confictu particularum sanguinis salino-sulphurearum, auctior calor; hinc totius corporis exæstuatio, hinc inquietudo, squalor, sitis, omniaque criticam Luctam comitantia symptomata; in quibusvis Vulgatis Medicinæ systematibus videnda: non tamen nisi hac, ex ipsa re desumpta, hypothese clare exponenda. Quæ Lucta, quæ symptomata usque & usque gliscendo, tam diu urgent, donec hac pressione, hoc confictu atque attritu evoluta, discerpta & extrita materia morbifica, & diluta sero affluentiore (quod urgente siti potu suggeritur, & in quod tandem eodem hoc attritu massa sanguinis colliquescit) commodè emunctoria convenientia subire, hisque secerni & ex-cerni queat.

Etenim vegetam hanc naturæ Luctam, & Vere Criticam, insequitur promte *ἐκκρίσις* (*excretio*) Critica: per large emanantes aut *sudores*, aut *diarhœas* varias, serosas, bilio-fas, mucosas, aut *urinam* variis onustam contentis, aut *salivationem* &c. &c. pro varia & ipsius morbose apparatus & insurgente Criticæ Luctæ conditione; ex speciali morbi cujusvis historia innotescente, nec generali complexu, eoque nec nostro instituto, determinanda. Qua excretionem, atque adeo *Completa Crisi* defuncta natura, redindegratur humorum massæ, sic depurata & veluti defœcata, pristina crasis & temperies: qua ordinarie & blande affectæ fibræ motrices, redeunt ex lucta ad ordinariam & tranquillam actionem: sicque omnibus numeris plena restituitur sanitas. Animadvertendus tamen

VII.

hic

hic *ὡς ἐν παρόδῳ* communis fere recentiorum scriptorum error, putantium, omnino ad Criticam *ἐκκρίσιν* requiri, ea ut fiat subito & repentine; sic ut omnis & inchoata & finita sit intra paucularum horarum spatium. Ad quod credendum inducti sunt Galenica, quam sequuntur, definitione, male intellecta: puta, quod *Crisis* sit *subita morbi mutatio* &c. Tò *subitum* enim in hac Criseos definitione, non utique hanc, quam sibi imaginantur, uno quasi ictu sive torrente fientem morbi mutationem denotat; sed solum opponitur *lenta*, paulatim evenienti, & sæpe in aliquot hebdomadas *protracta*, morborum chronicorum *solutioni*, sine ulla sensibili *excretionem*; quam idcirco proprie *λύσιν* appellant antiqui Auctores. Apud quos sane nusquam legitur talis, præcipitanter consummata, evacuatio critica; nisi forte vomitum excipias: nedum adeo *subita*, ut illi concipiunt, morbi solutio. Quin immo Galenus diserte edicit, *Criticam excretionem* non raro in duos tres dies *extrahi*: sic, ut v.gr. ea inchoans die septimo, continuet per octavum, & demum nono finiatur. Et ipse Hippocrates (observante Galeno) idem videtur indicare, cum passim Libb. Epidid. memorat, morbum fuisse *judicatum non die, sed circa diem, decimum quartum, vicesimum* &c. extracta videlicet ultra unius diei spatium *excretionem*. Quare inutilis est eorumdem novellorum scriptorum *caussatio*, multorumque (sine tropo dico) capitalium errorum *conciliatrix*: *Sub Climate nostro, frigido, genuinas excretionem & solutionem morborum Criticas, esse oppido raras*: tales nimirum, quas sibi frivole imaginantur, uno impetu & inchoatas & patratas, concedo ultro. Veras autem usque adeo raras esse, pernego: quæ utique pulcherrime & sub nostro, & forte vel sub hyperboreo Climate, procedunt, & tantum non omni die, si modo attendatur cum oculis animus, observantur. Atque adeo sunt ad salutem necessariae, ut ausim adseverare ego, confirmatus ab experientia, *nullum morbum vere acutum unquam finiri plene & tuto, sine aliqua vera & sensibili evacuatione Critica*. Quin & Medicis genuinis, non

Lib. 2. de D.
D. c. 5. & a-
libi.

non ex mustaceis talium scriptorum institutionibus, sed ex natura contemplatione sapientibus, compertum est, vel in ipsi^s morbis Chronicis, nullam fieri evacuationem materiae morbi, massae humorum suffusae, nullam adeo salutarem excretionem, nisi praevis motibus vitalibus (Medici consiliis & auxiliis promovendis) illa materia excernenda fuerit evoluta & secreta; hoc est, ut cum Hippocrate loquamur, *mobilis facta*, & *meatibus*, per quos est secernenda & excernenda, *aperta*. Atque adeo, nisi & in *ipsis morbis Chronicis* praesto sit haec *Natura vera Crisis*, medicamentis evacuantibus intempestive datis, qualiacumque demum ea sint, frustra turbatur motuum vitalium harmonia: & auferuntur, non sine futura gravi noxa, succi fluidiores & corpori utiles, hic bilis, illic Lympha &c. verbo, non purgatur corpus affectum, sed urgetur frivole, & geminato malo, prosternitur: Tanta est usque quaque Criseos & eccriseos criticae ad salutem necessitas.

Ab illa saluberrima Crisi quae fit per meram evacuationem, multum distat, proxime tamen abest *altera species*, eaque *ancipitis* quasi *alea*. Videlicet, cum pari motuum vitalium synergia, materia morbifica prorsus exterminari non potuit: sed saltem eo usque coerceri & compesci, ut extrusa quidem e Vitalium viscerum penetralibus, at non plene extrita, verum aliis humoribus sanis obvoluta & intricata, una cum his compellatur, aut ad emunctoria (fatigante eorundem tonico renisu) aut ad partes a Vitalibus remotiores alias, quibus interspersa hæreat. Ubi quidem parit aut varii generis *abscessus*, ut *bubones*, *parotides* &c. *papulas* item *suppurascetes*, quales in primis sunt *Variola*; aut *ἐξανθήματα* (efflorescentia) purpurea, *Livescentia*, ut in sic dictis *morbillis*, *petechiis*, *purpura* &c. Quo rite & ordine facta *materia morbifica secessu ex profundo corporis*, (ut scite alicubi Hippocrates) levatur quidem morbus, sed in tuto nondum est ægroti salus: donec, jugiter continuante motuum vitalium actione, hæc *ἐκθύματα*

VIII.

C

(eruptio)

(*eruptiones*) veluti coctione maturefcant: hoc est, id, quod habent, inquinamentum, massam sanguinis denuo facile subituum & retrocessurum, contemperatione sanorum humorum, & hinc sensim facta iusta subactione, corruptæque tandem portionis ablatione tollatur. Quod quidem sic dictæ *abscessionis* & *secessionis* negotium non æque est expeditum, neque æque securum (testantibus vel annuis Libitinæ rationibus) uti est Criseos per meram & absolutam excretionem.

IX.

Sin vero fibræ motrices visceris unius aut plurium, *hepatis* puta, *pulmonis*, *lienis* &c. rerum non naturalium prægresso abusu, sive ἀστωρίᾳ qualicumque alia, usque adeo fuerint infirmatæ & velut enervatæ, ut, fatiscente intensione & renixu tonico, non possint in materiæ morbificæ excussionem æque valentem cum reliquis Visceribus & partibus firmioribus conniti: non solum *inequaliter fluctuans*, *nutans*, *titubans* fit *Lucta decretoria*: sed & ipsa materia morbifica, reliquarum partium vegetiorum intensione excussa, in languentia isthæc viscera intruditur & compellitur. Unde fere duplicis generis perniciēs agrotum manet: alia ubi *lenta*, & paullatim eveniente, *stagnatione* & *congestionē* materiæ impulsæ, *tumores* fiunt ejus indolis, qui, aut sensim ulterius corruptâ materiâ contentâ, in *abscessus* vel potius *exulcerationes* abeunt: aut ablata portione humoris stagnantis liquidiore & fluidiore, in *scirrhus* indurantur; unde posthac prioris morbi conditio prorsus in pejus mutatur: (utrum ἐπιγέγερσις rite cum antiquis voces, ἀντιπαραστροφῶσις? cētent grammaticī: miseris sane parum prod-est) sic quidem ut vel inducta *febre Lenta*, hinc *hectica*, & *tabe*: vel subnata *cachēxia*, & tandem coorto *hydrope* (ob tumorem scirrhusum intercepta remeante lymphâ, hincque disruptis Vasis effusâ) *immedicabili*, agrotus morti cedat; utrobi-que lento gradu: Aut e contrario præcipiti, quæ altera species est funestæ translationis materiæ morbificæ, cum *repentina influxu*, & hinc *infarctū*, obruta languentia viscera, veluti suffo-

suffocantur; vel post insolubilem *inflammationem*, gangrena & phacelo affecta, subita morte Vitæ finem faciunt,

Hæc est, inde ab antiquissimis temporibus observatione constanti comperta, neutiquam tamen usque adhuc sine tricis perplexis exposita, naturæ contra morbum Lucta decretoria: ejusque varius (ut erat in definitione propositum) exitus, prout varie partium colluctantium alterutra præpollcat. Quibus extricandis mentem, puto, Hippocratis sumus consecuti: num & ipsam veritatem, ut quidem confidimus, in ætiologia simus assecuti? æqui arbitri judicent; equidem *in rebus*, quod dicitur, *facti*, ipsa rerum testimonia quosvis, etiam iniquos, aut convincunt, aut confundunt. Manet ergo & usque stabit inconcussa hæc Galeni sententia: *Neminem servari, nisi natura morbum superaverit: neminem mori, nisi natura victa fuerit, morbusque ea superior evaserit.* Porro est & erit usque propria *Arti Medicæ*, Naturam imitanti, sequenti, hæc verissima laus: nequidquam ringentibus mercis Chymisticæ nundinatoribus vanidicis, aut his nimium credulis susurronibus, in artem salutarem maligne contumeliosis &c. ea inquam Laus, quam Naturæ Consultissimus tribuit *CRATO: Natura duce, arte, non medicamentorum robore, Victoriæ in morbis recte & unice tuto obtineri.* Natura enim sola, ut repetamus *Verissimum HIPPOCRATIS* effatum, τὰς νόσους κέρει, καὶ ἐξαγνέει τὰ πάντα πᾶσι. Atque hæc (sunt verba prudentissimi nostri seculi Medici, *SYDENHAMII*) omnia peragit natura, paucissimis simplicissimisque adjuncta remediorum formulis, alicubi etiam prorsus nullis; Sed, quod merito addimus nos, unice adstantis Medici consilio: imperantis aut convenientem morbo & ægroti viribus abstinentiam, aut moderantis regimen victus, potus, caloris decubitus &c. arteque interim sagaci expectantis & solerter captantis validiorum remediorum, si ea poscat usus, εὐκαιρίαν s. *tempus opportunum* Quod sane, ut habetur *omnium rerum primum*, sic est in methodo medendi *potissimum arcanum*; usque adeo, ut, sine hoc

X.

Lib. de Tot.
Morb. temp.
Cap. V.

Epist. ad
Zyvinger.
ap. Scholtz.
f. m. 238.

fit, quodcumque demum & utcumque jactatum arcanum, quodcumque validum remedium, medicinæ nomine prorsus sit indignum immo (ut scitissime Celsus) *summa in eo pernicies sit, quod auxilii causa fuit inventum, si temere & inopportune adhibeatur.*

XI.

Est igitur genuini Medici, arte salutari tuto opitulaturi, hæc potissima, si non unica provincia, ut Naturam, scitissime coordinatorum motuum vitalium systema, intimius perlustret: ejus ἐφόδῳ, *molimina, impetus* in morbum observet: *methodos & vias salutarium secretionum & excretionum*, quibus eliminatur morbi materia, consuetetur: easque, ut & omnem naturæ actionem, suis & auxiliis & consiliis sic imitetur, sic adjuvet, ut si ipsa *Natura*, suis usa viribus ad τὰ δεόντα *sufficiat*, hæcenus provisorum & consiliarium agat, ut procuret duntaxat ea & suppeditet, quæ ad *sustentationem* opus sunt: & prospiciat, ne quo modo res non naturales, & extrinsecus advenientes, impedimentum obfundant. Sin vero *natura*, materiæ morbificæ *impetu* concitata, nimium forte, veluti suis abusa viribus, *ferociat & tumultuetur*, id agat, ut aut *materiæ contemperatione, dilutione &c.* aut *nimiorum motuum commoderatione per emollientia, demulcentia, paregorica, anodyna &c.* tempestive mitigetur & cohibeatur. Aut si e contrario, *natura motus*, moli materiæ velut impares, sint *remissiores, languidiores*: hos ipsos motus artis synergia, *medicamentis cardiacis, nervinis, tonicis*, Naturali temperamento accommodis, *incitet, augeat*; aut *molem redundantis materiæ morbificæ*, si quidem, ea prius *mobilis facta & preparata* fuerit, & *meatus secerniculorum expediti*, auferat, vel *paullatim quasi carpendo per ἐπίκρασιν, διαφώρσιν*, vel quo *natura vergit*, educendo & *affatim evacuando per ἰδρωσιν, διαρρῆσιν, καθάρσιν, ἑμεσιν &c.* ubi & medicamentis validioribus, ipsisque adeo drasticis, *manu Medici*, hoc est *opportune & convenienter*, datis, mitis erit aut utique tuta operatio. Sin denique *motus naturæ*

a via

a via aberrant, & sic deflectant, ut morbi materiam exsolutam & extritam ad loca non sua, sed incongrua & intuta convehant, naturæ consulens Medicus hos ipsos motus, mature admotis epispasticis, Vesicatoriis, aliisque (scite Bellino sic dictis) stimulis Medicis, conetur avertere & derivare: hincque ad emunctoriorum naturalium meatus, foru, enematis, frictionibus, balneis&c, emollitos, deterfos, apertos corrivare atque deducere. Hæc summam sunt Naturæ motibus consulentis Artis Medicæ conamina; quæ in salutem, cui parantur, cedunt, cum & ipsa Natura, Divini Auctoris nutu, remedium energiam secundet, &, quod dicitur, in actum deducat. Sin vero succumbens in solidum Natura defecerit, actum est, &, Afferat ipse licet Sacras Epidaurus herbas, conclamatum est. Velis nolis, hæc sacra aliter non constant. Nam præter hanc Naturæ Medicinam, nulla mortalibus est, & quæ contra hanc est, rebellans Divino ordini, ipsique adeo DEO, Gigantomachia est.

XII.

Et quidem hætenus in solido est, fundata ab Hippocrate Naturæ Medicina; usque adeo ut nullus tot seculis existerit Medicus genuinus, qui eam in dubium vocare, nedum negare sustinuerit; nam nemo qui sapit, puto, adnumeraverit Medicis, eos tales, qui illam ne quidem agnoverunt. Utinam pariter liqueret de statis illis & quasi solennibus diebus, quorum circuitu determinare & circumscribere, omnem luctantis Naturæ processum, & eventum veluti decretorium, conatus est ipse Hippocrates: eorumque dierum ratio, aut æque solido fundamento fuisset constituta; aut, hoc deficiente, intimius inspecta fuissent commenta & tricationes, quibus hi fasti nefasti dies, ab ultima & Hippocrati proxima antiquitate contemti, hinc denuo nacti præscriptionis velut Auctoritatem, ad nostrum ævum fuerunt transmissi; ut vel tandem eorum dierum superstitione nugari desineretur. Inquisitionem hanc cum hucusque refugerint ii, quibus competeat, nos, ceu alteram nostræ diatribæ partem, suscipimus:

C 3

& qui-

& quidem sic exquisituri omnem usque a stirpe auctoritatem, ut, fallens gravi specie, denudata & velut exposita conspectui appareat inanitas.

XIII.

Lib. I. Epi-
dem.

Galen Lib. I.
de Dieb.
Decret. Cap.
7.

Ipsæ *Hippocrates*, ut reperio universaliter enunciat: *Crisis, si fiat extra præscriptos dies, recidivas fore significat, aut fuerit sane perniciofa.* Unde colligit Galenus, illorum præscriptorum dierum tantam esse ad salutarem Crisin, necessitatem, ut, quamvis reliquæ cunctæ, bonæ aliâs futuræ Criseos, sive notæ, sive circumstantiæ, sive causæ concurrant, nihilominus tamen die non Critico contingens Crisis, secura non sit, sed infida, Hinc plane Aphoristice: *Fides, inquit, exquisita Criseos, a die sigillatur & obsignatur.* Et propterea illos salutare & albos dies, quos Græci *κρίτινους* & *κρίσιμους*, interpretes decretorios, judiciales appellant: eo quod sint, ut frigide argutantur *Claudius* & alii, arbitri pugne naturæ.

XIV.

Cum igitur istorum statutorum dierum tam certa perhibeatur efficacia: morborumque extra eos finitorum tam certa pernicies: certus utique & definitus eorum oporteret esse canon, & calculus, seu liquida eos computandi ratio: hæcque ante omnia certa & constante observatione, atque hinc nata firma doctrina fuissent constituenda & promulganda. Equidem Systematum nostrorum compilatores, tantum non ad unum omnes, aut in Lectione Hippocratis & Galeni minus versati, aut, quod in plerisque apparet, nodos astu dissimulantes, cœu res omnis illorum Patrum industria & auctoritate dudum esset confecta & stabilita, dies illos Criticos, sine ulla hæsitatione, planissime enumerant. Non itidem ipse Hippocrates. Qui sane, secus ac illi ipsi aut credunt, aut sibi credi volunt, mire fluctuat, & est in recensendis his diebus fastis ne fastis, usque adeo obscurus, ambiguus, incertus, quin immo ipse sibi adeo disconveniēns, ut sane vel sagacissimi interpretes non reperiunt,

Quo teneant vultus mutantem Protea nodo.

Provoco,

Provoco, ne injurius censear in eum talem, qui fallere & falli nescius in hunc usque diem prædicatur, ad ipsa Hippocratis decreta: & quidem desumta ex iis Libris, qui habentur consensu omnium genuini. *Libro Epidem. I. sect. 3. Dierum decretorum & parium & imparium* recensetur numerus prorsus perplexus & indiscretus: nec additur, an & qui illorum dierum, præ ceteris, sint ad salutem vel perniciem ægroti magis efficaces & præpollentes: *circuituum*, inquit, *qui diebus paribus judicant, primus est decretorius quartus, sextus, octavus, decimus, DECIMUS QUARTUS, vigesimus octavus, trigesimus, quadragesimus, sexagesimus, octogesimus, centesimus.* *Circuituum autem, qui diebus imparibus judicant, primus est tertius, quintus, septimus, nonus, decimus septimus, primus & vigesimus, septimus & vigesimus, trigesimus primus.* Alibi vero hanc circuituum congeriem aut ipse nihil morans, aut saltem non animadvertens, solis diebus imparibus (*περίσσοις*) vim atque efficaciam criticam tribuit; eamque primum velut indifferentem, sive ad salutem, sive ad perniciem: ut cum *Lib. de Rat. Vict. in M. A.* inquit, *maxime vero numerus impar est observandus; nempe quod hi dies (impares) magnam in hanc vel illam partem inclinationem efficiant.* Hinc & dies impares, ceu unice Criticos, diebus paribus non Criticis opponit, & quod dicitur, contradistinguit: *Si quidem paribus diebus accesserint (delirium & convulsio) melius; judicatoriis vero perniciosum.* Quin immo tandem, hanc universalem edicit sententiam: *Febricanti, nisi diebus imparibus dimiserit Febris, reverti solet.* Sic ut ex his, & pluribus aliis locis, quæ, ne præter rem prolixi simus, omittimus, liquiddissime constare posse videatur, Hippocrati solos dies impares habitos fuisse & vere Crisimos, & unice salutare. Verum enim vero his decretis si conferantur, quæ *Lib. 3. Prognost. §. I.* enunciantur non minus aphoristice & universaliter, quanta non denuo apparet diversitas? immo adversa fronte pugnans sententia? Hæc enim sine respectu ad dies impares, dierum Critico-

Edit. Gener.
Eod. f. 399.

Lib. Eod. f.
m, 401.

Lib. IV. A-
phor. 61.

Criticorum series constituitur per *quaterniones* & *hebdomadas*; sic ut inter illos referatur, præter quartum, dies decimus quartus, & mira sane ratione, nec cum quaternione constante, vicesimus; quos quidem, ut communis hominum sensus, sic ipse Hippocrates, paribus diebus, ut modo vidimus, adnumerat: *At vero*, inquit, *febres judicantur eisdem numero diebus, quibus fit ut supersint homines aut moriantur. Etenim febres mitissima & cum signis conjuncta tutissimis, quarto die cessant. Ergo primum natura & morbi certamen sic definitur. Alterum vero ad septimum diem producit. Tertium vero undecimo definitur die. Quartum ad decimum quartum producit. Quintum vero in decimum septimum definit. Sextum autem ad vigesimum. Conf. Lib. 2. Aph. 26. & Lib. de Judicat.*

XVI.

Habemus igitur de diebus Criticis triplicem, eamque omnino diversam, & contrariam Hippocratis sententiam: unde apparere, puto, plane potest, ut incerti, ut Vertumnis iniquis nati sint dies critici. Nunc, eos ut Galenus frustra tollat, ornet, & ceu male consistentes subfulciat, videndum est. Sic enim, remoto veluti sipario, nugatoria futilitas sensim fiet perspectior. Equidem, ut reperio, agnoscit ipse Galenus esse illa Hippocratis decreta ambigua, incerta, dissidentia, & inter se pugnancia; hinc ea ut componat & conciliet, indidemque consistentem doctrinam extricet, mire satagit &

Lib. de D.D.
c. 3.

æstuat. Primum, ut ipse fatetur, conjecturat, Hippocratem, dum adhuc incertas opiniones experimentis exploraret, nec universalem hinc sententiam auderet pronunciare, *Libro Epidemicorum* loc. cit. multos promiscue & indiscrete dies, decretorios & intercidentes, quos vocat, in unum congeßisse, quos deinde, confirmator scilicet ab experientia, circumcideret, & in justum ordinem redigeret: hoc quoque demum fecisse Libris Prognosticorum & Aphorismorum. Equidem hæc Galeni conjectura non est de nihilo. At vero, dum elevat auctoritatem istorum *Librorum* *Επιδεικνών*, est

sane

sane, ut cum Comico festivo loquar, *nania soricina confossior*; nam suo iudicio prodit universæ doctrinæ, tanto molimine struendæ, infirmitatem. Etenim ex illis ipsis *Libris Epidem.* illisque solis, cum experientiâ Hippocratis conatur stabilire dierum Criticorum rationem, ipse Galenus omnem sumit probationem, & auctoritatis præscriptionem. Hoc est, quod una manu struit, altera ipse diruit; &, quod non minus vitiosum est, tantus Magister ex privatis aliquot observationibus, neque iis adeo multis, neque (ut infra demonstrabitur) perpetuis & usque constantibus, sed omnino variantibus, quas inter fluctuans Hippocrates, definire ipse nihil vel potuit, vel, quo fuit candore, voluit, Galenus universalem & firmum dierum Criticorum canonem exsculpere & constituere ausus est.

Perfunctus hac sua conjectura acuta Galenus, & animadvertens diversa & contraria Hippocratis decreta constare aliter non posse, excogitatis miris *Crisium & dierum Criticorum* distinctionibus, quibus, ut solet sepia obfusis tenebris, ne capiatur cavet, tandem confitetur & caussatur, posse quidem *Crises* omnibus diebus accidere, sed neque pares numero, neque æquali fide; hoc est, alias bonas & salutares esse, alias malas seu funestas; adhuc quasdam cum pluribus & difficultibus symptomatibus, quasdam ab initio statim tuto invadere; tum in hoc plurimum differre, quod sint aliæ obscuræ, incompletæ, deficientes, aliæ e contrario manifestæ & perfectæ; denique fieri alias, non nisi indicatas certis & statutis diebus, alias repente & ex improvviso, sic ut non solum artis medicæ ignari, sed & exercitatissimi Medici eas instantes præscire non possint. Hinc ut *Crisium*, sic & *dierum Criticorum triplicem* constituit *ordinem*: ita ut sint alii dignitate & potentia præstantiores, morbum & frequentissime & perfecte & salubriter finientes, *proprie & xupios Critici*; alii ad salutarem & funestam, absolutam item vel imperfectam morbi solutionem indifferenter se habentes & ancipites; alii denique, qui vix unquam vel saltem rarissime morbum plene & salubriter finiant, sed post symptomata gravia, turbulenta, aut tristem catastrophem, aut

„saltem recidivam inferant &c.

Quæ quidem sollicita & cauta dierum Criticorum discriminatio & digestio, velut in certos ordines atque stationes, sapit, præ illa proditrice conjectura, Galeni ingenium acutum, vafrum; num æque vero mentem Hippocratis? viderint, quorum interest. Equidem Hippocrates universaliter pronunciat loco citato Libr. Progn. *Febres judicari EISDEM NUMERO DIEBUS, quibus fit, ut supersint homines, aut moriantur.* Quam sententiam iisdem fere verbis Libr. de *Judicat.* repetit. Ex quibus utique planis verbis, non potest concludi aliud, quam Hippocratem, harum Galeni distinctionum penitus ignarum, & ancipites & malas crises corundem dierum termino adstringere; quibus & Crises certæ ac salutare sunt. Sic ut morte occumbentes extra hos statos dies, non occumbant Crisi male procedente, sed ἀκρισία: hoc est, materiæ morbosæ aut copia aut malignitate succumbente natura, eoque ad pugnam decretoriam impari. Quod si vero regerant admiratores antiquitatis nimii, alibi Hippocratem mentionem facere Crisium die non Critico contingentium: *Si judicatio fiat extra præscriptos dies, recidivas fore significat, aut fuerit sane perniciofa*: Concedunt nobis, quod volumus, Hippocratem fluctuante sententia nutare, immo suis ipsum decretis repugnare. Eumque adeo a Galeno hætenus magis fuisse proditum, quam defensum.

Lib. Epid.
loc. supr. cit.

XVIII.

Enimvero hæc aut vafre dissimulans aut parum curans Galenus, illi dierum Criticorum ordini, quem excogitaverat ipse, denuo fundamentum substruere molitur ex decretis Hippocratis; suis commentis, ut vidimus, magis labefactatis, quam adfertis. Eum in finem, in re utique precaria, adoptat & eligit, præ reliquis Hippocratis oraculis, sententiam Lib. Progn. & Aph. 26. Lib. 2. Ubi *Crises* perhibentur & perfectæ & salutare, quæ procedunt per *quaternarios & hebdomadas*. Animadvertens autem Galenus huic sententiæ manifeste repugnantem Aph. 36. Lib. 4. *Febricitanti, nisi diebus imparibus dimiserit Febris, reverti solet*: nodum hunc perplexum, artium Græcarum

rum oblitus, non dissolvit, sed dissecat, veluti stomachabundus; hoc est, in Comment. super dicto Aphor. *negat Aphorismum hunc esse genuinum, immo disertim negat verum esse: propterea quod Hippocrates Crises die & quarto, & quarto decimo & Vicesimo, qui omnes pares sint, fieri edicat ll. c. c. hisque diebus salubriter factas crebro enumeret Libb. Epidd. passim.* At tamen, composito mox animo, cum deprehendit tot Hippocratis loca ex stare, quibus Crisis non nisi imparibus diebus fieri, universaliter & quasi ex tripode edicitur: v. gr. præter *ll. supr. cit. Libr. 4. de Morb. passim &c.* hincque facile prævidit, si omnia hæc Loca, ipsumque adeo Hippocratem, ceu doctrinæ constituendæ fundatorem, falsitatis argueret, se plane proditurum, immo pessum daturum omnem causam, cui defendendæ tantopere insudaverat, ad ingenium redit: Ille ipse, puta, Galenus, qui *dies decimum quartum & vicesimum* pares in modo dixerat, uti & communi hominum sensu sunt, nunc jubente sic, & cogente Hippocratis sententia, *impares* facit: Sed festivum est ipsum Galenum audire, commentantem ad hæc Hippocratis verba: *maxime vero numerus impar observandus. Dies impares, inquit, in acutis hi sunt: tertius, quintus, septimus, nonus, undecimus, DECIMUS QUARTUS & decimus septimus: in Longis, sexagesimus & octogesimus. Medii horum sunt VIGESIMUS & trigessimus quartus & quadragesimus. IMPARES autem & hi.* Miro sane calculo. Non contineor, quin exclamem cum Satyrico: *Ludere par impar - - - quem delectet barbatum?* Javit tamen Galenum; qui eo lusu, mire & ipse sibi, & suis sectatoribus placuit, admirantibus hujus computationis acumen.

Quod quidem omne (ut patet ex *Comment. 3. Prognost. f. m. 419. & Lib. 3. de D. D. cap. 12.*) in eo est, ut hebdomadas, ex quibus conficitur dierum Criticorum circuitus, aut separet pro arbitrio, aut eas conjungat s. copulet. Videlicet ut fiat dies *decimus quartus impar*, duas, ex quibus constat, septimanas divellit, & separatim ab octavo die numerare incipiens, ab hoc,

Comment.
in Hipp. de
Rat. Vi&. in
M. A. 5. 56.

XIX.

ceu septimum & imparem decimum quartum facit. E contra-
rio ut ex tribus dierum septimanis conficiat, non (ut homines
solent) diem Vigesium & unum, sed (præter sensum commu-
nem) Vigesium, eumque *Vigesium* diem in *imparem* trans-
mutet, sic conjungit & complicat tres septimanas, ut denuo nu-
merare incipiens a die Decimo quarto, aut hunc frivole bis nu-
merans, ad Vigesium usque habeat dies septem, hincque suo
arbitrio & Vigesium imparem. At vero quis non aut rideat,
aut potius indignetur in re tali, utique seria, tam nugacem, tam
frivolam cavillationem; imprimis cum aperte repugnet illa ipsa
anómala supputandi ratio iis decretis, quæ ipsemet Galenus se-
quitur. Nam si octavus dies, a præcedentis septimanæ diebus
avulsus, seorsim consideratur ceu dies primus, ab hoc utique se-
cundus erit nonus, & undecimus porro quartus; eoque utrique
hi dies, nonus, puta, & undecimus, eadem supputandi ratione
erunt pares; eodem utique privilegio, quo est vigesimus impar.
Quod serio statuere, uti non est hominis, sic everteret omnem
non solum dierum Criticorum imparium (cui tamen hæc frivola
calculatio est excogitata) rationem; sed & eam *canonicam Hip-
pocratis doctrinam*, qua diebus imparibus, nono, undecimo &c.
cathartica exhiberi vetat. At tædet sane atque piget talium
nugarum; quarum tamen fuerunt protrahendæ aliquot species
(nam quotquot sunt omnes consecrari, esset opera abuti) ut
vel tandem appareat ipsis Tironibus, quæ male nati dies Cri-
tici, sint male sano & tenui tibicine fulti. Quod quidem adeo
evidens est, ut nullus dubitem, quin Viri illi insignes, utique
propter alia egregia merita colendi, suspiciendi, qui auctorita-
tem dierum Criticorum nostro ævo adeo impense adsertum
eunt, ipsum Galenum aut nunquam, aut non ea attentione.
serie &c. legerint, quæ ad paullo exquisitiorem censuram re-
quiruntur.

XX.

His igitur & similibus tricis implicitus Galenus, suis-
que artibus, ut vidimus, adeo non expeditus, tamen consti-
tuit nihilo secius, suo arbitrato; eum *dierum Criticorum or-
dinem*,

dinem, quem, ceu liquidissima ratione deductum, systematum scriptores, miro ad hunc usque diem consensu, excipiunt & divulgant ut canonicum. Est autem iste ordo triplex. Primus & præcipuus complectitur dies Criticos, ut volunt, *genuinos, principes*, & (ut loquitur cum Avicenna Arabum cohors) *radicales*; qui per quaterniones & hebdomadas procedunt; nempe a die *quarto* ad *septimum*, inde *undecimum*, *decimum quartum*, *decimum septimum*, denique ad *vigesimum*: anomala, puta, illa supputatione; nam de prerogativa diei vel vigesimi, vel vigesimi primi, altercatio Galenum inter & Archigenem atque Dioclem, stantes pro vigesimo primo, nondum decisa est; longæ sunt ambages, longæ injuriæ, eoque tranquillitati consultum est, quod creditum est Galeno. Post hunc vigesimum qui succedunt dies (mira Physiologia) sensim languent, & tandem, post quadragesimum, septenariorum vis penitus perit *Galen. de D. D. Lib. 1. c. 10. & alibi passim. Confer. Claudin. Sect. 2. Cap. 1.* Istorum autem dierum præcipuus perhibetur *septimus*, non solum numero & ordine, sed & potentia & dignitate, Etenim *plurimos*, inquit, (*l. c. Cap. 4.*) *judicat, & absolute, item cum manifesta excretionem vel abscessum* (*cap. 2.*) *fidenter, tuto, salubriter sine periculo vehementer*; hinc eum, miro utique schemate, *Regi* comparat &c. A septimo proximus *decimus quartus*, & hinc *Vigesimus*; utrique equidem non dignitate æquales, (quasi aurificis statæra essent examinati) sed tamen pollentes salubri adhuc efficacia. *Quartus* dies (*Lib. 2. cap. 2.*) aut ipse morbum, si fuerit celerioris motus, nec malignus, solvit (quod tamen rarissime contingere, & non nisi semel a se observatum commemorat Galenus; nimirum, nullo artificio potest subigi dies quartus, ut fiat impar) aut indicat futuram septimo Crisin, & ad hanc morbi materiam præparat. Similiter *undecimus & decimus septimus* indices sunt decimi quarti & Vigesimi, aut æque morbum solvunt.

Hos inter *γνησίους Criticos* & quasi *fastos*, qui intercedunt *dies impares*, secundum ordinem dierum Criticorum

Lib. I. de D.
D. cap. 5.

Constituunt: volente sic & ordinante Galeno; quantum colligi potest ex *Comment. 3. Epidem.* Nam ubi ex professo de dierum Criticorum ordine agitur, recensio est mire perplexa, & adeo obscura, ut hinc nil fere, præter artem Galeni, latibulis sibi caventis, discas. Feruntur autem hujus ordinis dies, in prima septimana, *tertius & quintus*, in secunda *nonus & decimus tertius*, in tertia *decimus quintus & decimus nonus*. Dicuntur *intercidentes*, aut stylo antiquo Calendarii Romani, *intercisi* seu *promiscui*, velut inter fastos & nefastos intermedii: item *provocatorii*, eo quod creditur, provocare eos naturam & incitare, ut ante tempus (Galeni arbitrio) constitutum & legitimum, præcoccem & præcipitem moliatur humorum excretionem. Hinc censentur quidem hi dies inter Criticos, propter eam prærogativam, quod sint impares: at Crisis, quam producant, perhibetur imperfecta, manca, ancipitis alex, nimirum quod fiat naturâ irritatâ, hinc & extra orbitam (Galenicam) actâ.

XXII.

Lib. IV.
De natura

Præter hunc duplicem dierum Criticorum censum, qui sunt reliqui *dies pares*, mira Galeni arte in tertium ordinem coguntur. Sunt enim valde disparati: quippe eorum alii, ut *secundus, decimus, duodecimus, decimus sextus, decimus octavus*, perhibentur prorsus nihil habere Virium, adeo ut nec decernant, nec indicent, porro nec provocent, nec promoveant naturam; eoque *vacui* dicuntur: & si res est uti dicitur, revera festi & feriati dies sunt; nisi quod tunc, ex illo Canonico præcepto Hippocratis, catharticus locus sit: quibus atque naturæ, quod agat, negotii plus satis dari potest &c. Sin vero his diebus vacuis, eoque prorsus præter naturæ (quem ipsi commenti sunt) ordinem Crisis contingat, quod tamen non nisi rarissime fieri perhibent, eam non posse non esse male tutam, si non penitus perniciosam, adseverant. Alii istius ordinis dies, & quidem, ut observo, septimo utrimque proximi, *sextus & octavus*, feruntur quidem Critici, at absolute *nefasti, atri, perniciosi*; in primis *sextus*, in quem velut

in Cerberum Galenus ubique declamat, & flatu Afiano infur-
git. Caussam forte ii viderint, quibus Galeni technæ sunt per-
spectæ. Nobis sufficiat, ut pateat sententia, non nisi pauca ex
his declamationibus excerpere, & quidem ex *Lib. I. de D. D.*
Cap. 2. 4. & 5. *Sextum*, inquit, *tanto maligniorem invenio;*
utpote naturâ ex adverso oppositum septimo. *Judicantur qui-*
dem morbi in sexto frequenter, sed cum difficilibus symptoma-
tis, & periculo non mediocri; adhac absque fide, obscure, sine
notis, & omnino ad malum: hocque ultimum ei maxime pro-
prium est, sic ut sexti naturam nullus aliorum dierum imitetur
--- Hinc porro sic paratragœdiat, *mihi equidem sæpius in men-*
tem venit septimi diei naturam Regi adsimilare, sexti vero
tyranno: nam vel perniciæ illius, quem judicandum accipit,
gaudet, vel salute dolet, queritque (istud hujus diei Dæmoni-
um) *ubi animum expleat, & agrum, qui in illum incidit, male*
(cecu Ixionis rotâ) tractet, & longa punitione exerceat &c. Qui-
bus omnibus ampullis & tricationibus hoc adstruere velle vide-
tur Galenus, Crises eas tantum esse perfectas, tutas, salutare,
quæ septenariis & semi-septenariis dierum circuitibus & gradi-
bus incedunt: reliquorum imparium dierum Crises esse ancipi-
tes: ceteris vero diebus paribus aut fieri nullas, aut perniciosas,
omnium vero perniciosissimas, sexto.

Hæc septenariæ periodi admiranda & præpollens effica-
cia, unde sit? a qua causa? mire, ut reperio, & ad pudendas
usque ineptias, tot seculis investigatum, disceptatum & nu-
gatum est. Octo & amplius discrepantes variorum sententias,
quas & omnes impugnat, *Claudinus* enumerat. Eum evolvant,
qui talia amant. Nos secure colligimus, rei in Natura non in-
ventæ, sed arbitraria & precaria sententia (ut hæctenus vidimus,
& porro liquebit) conceptæ, adeoque nihili, certam velle ad-
signare causam, esse & frivolum & frustraneum. At enim
Cl. Baglivus, qui acri Zelo pro dierum Criticorum aucto-
ritate pugnat, quem & sequuntur alii nostræ ætatis *Medici*
Celeberrimi, rem omnem salvam fore existimat, si modo atten-
datur

XXIII.

De Prax.
Med. ad
Prisc. obs.
rat revocand
L. II. Cap. 12.

datur ad naturæ ordinem usque quaque constantem, eoque sic procedentem, ut non nisi stato & certo tempore cujusque actionis naturalis effectus obtineri queat; hocque exemplo fermentationis conatur illustrare: in *Liquoribus fermentiscentibus*, inquit, *Natura lege cautum est, ut eorum quisque fermentationis & depurationis suæ motus determinatis diebus absolvat; a qua quidem lege ne minimum quidem eos recedere observamus. Item fructus determinato dierum spatio ad maturitatem perveniunt, & quaecunque demum artificium adhibueris, ut ante statutum a natura tempus vel fructus vel liquores alii (ut loquitur) fermentiscibiles maturationem absolvant, frustraneum propemodum erit & vanum; si quidem ad corruptionem potius, quam ad maturationem violentia illa dispones &c.* Hac hypothese, his exemplis (quibus motus naturæ Criticos non valde accommodate adsimulat) quasi dierum Criticorum difficultates omnes, quibuscum tot seculis luctatum est, sustulisset, magnifice equidem se effert. Verum enim verò aut ipse non animadvertit, aut sane vafre dissimulat, se recoquere ipsissimam *Averrhois* de diebus *Crisimis* sententiam, jamdudum antiquatam; eoque novam refutationem non meritam. Hoc equidem norunt vel ipsi *Physices Tirones*, & nemo unquam, quantum scio, negavit, ut actio naturalis assequatur suum effectum sive terminum, inter causam agentem, quæ est motus, & patientem, seu motu perficiendam materiam, necessariam esse certam proportionem, seu congruentiam; eoque & certam atque determinatam motus speciem, & determinatum motus vigorem & impetum, item talis motus convenienti serie, seu mavis, numero continuationem: ergo & statum tempus; quippe tempus heic nihil aliud est, quam mensura sive enumeratio seriei motus. Sed quid tum? utrum hinc efficitur, *materiæ* in tot morbis (qui Crisi finiuntur) tam varia, eoque & tam varie afficientis naturæ motus, unum & eundem posse esse terminum, iisdem, & uno gradu procedentibus, diebus Criticis constituendum? an potius omnino contrarium?

trarium? Ille declinetur invidia, dixerit *Vallesius*, qui sesqui ab hinc seculo, hanc *Averrhois* sententiam planissime, ut puto, confutavit: *Quod si*, inquit, *proportio potentiae agentis ad resistantem faceret morbos his aut illis diebus terminari, cum haec variare possit, aut mutata succi (materiae morbi) quantitate, aut aucta imminutaeque virtute (vigore motuum Naturae) singuli dies possent esse decretorii; nam si in morbo, qui septimo die erat judicandus, tantillum succi detrahas, addasve, facies ut sexto aut octavo judicetur. Quare cum proportio in singulis naturis, & in singulis morbis permutetur, non possent & morbis omnibus & temperamentis, & regionibus, & aetatibus & temporibus esse iidem decretorii dies - - nec ulla ratione fieret, ut in his intus, in illis minus tuto morbi judicentur; quod ad fidem dierum Criticorum pertinet.*

Controvers.
Medd. L. X.
Cap. 1.

Is ipse igitur *Vallesius*, ut auctoritas diebus Criticis (si pote) facta testis adferatur, adquiescit in sententia *Galeni*; quæ statam illorum (si quæ est) periodum, quam in tanta morborum varietate, ab una & sola causa intrinseca habere non possunt, tribuit causis (ut loquitur) *cœlestibus, mutationibus elementaribus*, ut putat, *non obnoxiiis*; hoc est, ut verbo dicamus, *periodo & influxui Lune*. Non desinit hæc sententia in hunc usque diem obtrudi; licet jam dudum confossa a *Valleriola* & penitus jugulata, ceu apertæ ipsorum *Astrologorum* doctrinæ plane contraria. Hinc & *Galenum*, profitentem se ab *Ægyptiis Astrologis Genethliacis* fuisse edoctum, qua ratione non solum *Lunæ* motus in quadratis signis & oppositis, diebus, ut fiant Critici, vim infundat: sed & pro vario ad Planetas varios aspectu, dies pariat agrotis pariter atque sanis aut faustos aut infaustos; *Galenum*, dico, ex anili credulitate hæc nugantem, merito sic redarguit *Fracastrorius*, at quantus Astrologus! Certe, inquit, *nedum si Ægyptius aliquis Astrologus, sed si Ægyptius aliquis Deus, aut Anubis aut Osiris, hæc mihi dixerit, non facile credam.*

Lib. 3. de
D.D. Cap. 1.

Loc. Comm.
Lib. 3. Cap. 7

Opp. Tom. 1
p. m. 28.

XXV.

Nec forte omnino firma, quæ de *Lunæ influxu* commentus erat, habuit ipse Galenus. Etenim confitetur, se commotum amicorum sollicitationibus, ea edidisse quasi invitum. Eoque monet, non tam his commentis, quam *experientia*, & hinc nata *observatione* dies Criticos esse constitutos: unice ergo & hinc eorum auctoritatem adserendum. Æquum sane est, quod & monet & postulat. Nam ubi de *re* aliqua *vere existente*, seu, quod dicitur, τῷ ὄντι, aperte constat, eam ipsam rem nemo sanus ideo negaverit, quod *rei causa*, *modus*, seu *forma*, τὸ διότι in incerto sit, vel ignoretur. Sed enim? unde colligemus eam experientiam, eas observationes, ad quas Galenus provocat? Ab *Hippocrate* utique præter *Libros Epidemicorum* nihil habemus, nec habuit ipse Galenus. At ex his Libris, quorum auctoritatem ad probandum idoneam ipsemet (ut supra vidimus) evertit, qua fronte, quo successu, petere potest subsidia, & auctoritatis, utiloquuntur, præscriptionem? Porro, cuinam sententiæ, cui dierum Criticorum ordini, quem triplicem eumque omnino diversum & contrarium apud Hippocratem invenimus, quemque Gratiis adeo invitis Galenus, ut liquido deprehendimus, conciliare & ordinare conatus est, cui, dico, horum dierum ordini adseremus ex his libris Epidemicorum fidem atque auctoritatem? Si uni: evertimus utique reliquos; forte frivolo aut saltem incerto iudicio: cum quidem de singulis æque universalis & aphoristica, eoque parem fidem merita, Hippocratis sententia habeatur. Verum tamen, ut simus paullo indulgentiores, concedamus relatis eo libro experimentis Hippocratis, ut hinc statuatur de prærogativa illorum dierum, qui procedentes septenaria & semiseptenaria periodo, unice perbibentur genuini & salutes Critici. Hinc constituatur, hinc iudicetur *rex* (Galenus) *septimus*, & *tyrannus sextus*.

XXVI.

Equidem recensentur in his libris hic illic exempla Crisium salutarium diei septimi, sic satis numerosa; quæ omnia Galenus sollicite colligit, una serie enumerat, & extollit. Quæ
vero

vero ibidem memorantur exempla, numero tantum non paria, Criscos, die septimo ancipitis, aut recidivam aut prorsus mortem inferentis, ea vafre dissimulat, vel quantum potest elevat. Hoc est, præter æquum hypothese conceptæ calliditate consulit. Enumerat pariter Crises decimi quarti, decimi septimi, verbo omnium dierum, qui hypothese congruunt; & ut vicesimo præ vicesimo primo (contra Archigenem) jus principatus adquiratur, sane joculariter, quasi captat suffragia; cumque in finem aliquot capita libri de D. D. prodigit. Hocque agens simulat, se non sine impensa cura, & exquisito judicio, de singulis diebus disceptare & arbitrari. Sin vero auferamus phaleras, apertum fit, idipotius cunctis his Logis & tricationibus Galenum agere, ut occupentur Lectores, ne attendant ad alia, oppido tamen frequentia, Librorum Epidemicorum loca, quibus factæ recensentur *Crises*, omnino *salutares*, die non solum (Galenii arbitrio) *non Critico*, sed atro penitus, ut *octavo*, & *sexto*, illo tyranno, scilicet. Omnia ista loca coacervare, ut in promptu, sic esset operatibuti. Sufficiat pauca, & ea quæ instar omnium esse possunt, selegisse. *Lib. 3. post constit. pestil. Aegr. XII.* Legitur *Crisis die sexto*, per *efficacissimas evacuationes*, sc. *emanantem*, post largam hæmorrhagiam, *sudorem* copiosum, calidum & per universum corpus æqualiter diffusum, coque *optima nota*, *perfecte* & *salubriter* finisse (*πυρετὸν καυσώδην*) *febrem ardentem*, morbum, puta, acutum gravissimum. Quid ad hæc Galenus? in *Libris de D. D.* hoc est, suo loco, ne μὲν quidem. Nil curat; nil est, quo patiatür se averti, ne quidem experientiâ manifeste contrariâ, quin contra imaginariam diei sexti tyrannidem paratragediet. At tandem ad hunc Hippocratis locum sic commentatur, sic caussatur: *mirum* inquit, *morbum non revertisse*; *cum sextus non judicet unquam fideliter*. *Quare novum hoc & rarum illi accidisse judicavit, cum scripsit: huic non repetiit, sed judicata est; tanquam oportuisset repetere.* Frivole sane! quid enim

Comment. 3.
in Lib. Epid.
f. m. 294.

enim? unusne hic locus narrat Crisin die sexto factam? sic ut rara ea & admiranda sit? Hoc equidem ut posteritati persuadeat Galenus, enixe, ut reperio, laborat. At *Libr. 4. §. 4.* Sub *Vergiliarum occasum* (non uni tantum & alteri, sexto die Crisin contigisse, veluti præter solennem ordinem & fortuito, sed) *omnia die sexto & octavo judicata fuisse*, memorantur. Et, ne forte arguatur, Crises istas omnes fuisse perniciosas, additur illico §. 5. exemplum *Fœmina ex καυσινῶν* (ustione seu inflammatione) *diarrhœa & præcordiorum angustia pessime habita, at salubriter ipso illo die sexto sudoribus judicata.* Hæc tamen similiaque *Lib. 4.* loca Galenus & alto silentio ulciscitur, seu supprimit, & evertere admota sibi ubique parata machina conatur.

Comment. Nimirum *negat hunc librum quartum esse genuinum Hippocratis* factum; quin immo, hunc ipsum non solum optimi Parentis **in Epidem.** *agnominatione, sed & Thessali* (Hippocratis Filii) **Lib. VI. f.** *adoptivis &* **297. & seq.** *tutela excidere, severâ notâ censet.* At vero, & hanc notam

Lib. 3. de dudum redarguerunt, quotquot fuerunt cum Prospero Marti-
Dyspn. niano genuini Hippocratis Commentatores; &, quod sane miror, ipsemet Galenus, sui oblitus, inconstantia utique non Censoria, alibi sic censet: *At quoniam, ait, secundus,*

Lib 2 de D. *QUARTUS & sextus* **D. Cap. 4.** *Επιδεικνῶν Liber, vel ipsius Hippocratis est, vel ejus Filii Thessali, paucâ etiam inde sumemus &c.* h. e. Hippocratis est non est, prout visum est Galeno expedire, vel nocere causæ atque hypothese, cui suo arbitratu patrocinatur. Quod sane est futilissimum. Licebit igitur nobis, meliori utique jure, hoc libro vindicato sic instare, ut hujus pugnae fiat tandem pausa! Videlicet ibidem §. 15. tempestatem aliam, suo more, brevibus describens Hippocrates, *post Vergilias, inquit, tempus placidum, nubilosum & caliginosum fuit: Crises & quinto, & sexto, & septimo die fiebant, itemque longius procedebant.* Id est, promiscue fiebant, sic, ut nullus dierum Criticorum neque circuitus, neque certus terminus definiri potuerit.

Hinc igitur, ut vides, planissime liquet, ne quidem ab experientia Hippocratis, ad quam cum Galeno provocatur hodieque, imaginariis diebus Criticis quidquam esse præsidii. Atque adeo cum & hinc causa cadant, & excogitatae iis constituendis cunctæ rationes, ut hætenus est perspectum, futiles sint & prorsus nullæ; non est, puto, quod dubitemus, quin jure contemserint alborum & atrorum illorum dierum fabellas & offucias, antiquorum Medicorum prudentissimi. Sunt vero ex illorum ordine veluti antesignani, primum *HEROPHILUS*: cui ipse Galenus, in adversarios ubique iniquus, hanc meritam laudem denegare non sustinet, *quod in omnibus, quæ ad artem spectant, fuerit sane eruditus*; quem & *Celsus* inter præcipuos Medicos numerat, & ceu naturæ indagatorem insignem passim prædicat: tum *XENOPHON*, ab ipso Galeno pariter laudatus: porro, *ASCLEPIADES*; cui quidem Galenus, ut Auctori sectæ cui erat infensissimus, ubique quantum potest detrahit: *Asclepiades*, inquit, *in eo omnibus refragatur Medicis non solum, verum etiam reliquis hominibus, quod omne in morbis naturæ decretum & decretorium diem, & naturam pro animalis salute in universum quidquid moliri negat*. At vero is ipse Asclepiades, vindicem nactus Celsum, Romanum ingenuum, a Græculorum technis alienum, eoque ut æquiores, sic fide digniores judicem, longe alius, quam Galenus eum haberi voluit, apparet. Is igitur refert, *Asclepiadem quidem jure dies Crisimos repudiasse, neque in ullo die, quia par impar esset, agris vel majus vel minus periculum esse, dixisse, hincque Medicum non numerare dies debere: cum utique, ut prudentissime & vere ipse Celsus arbitratur, minime in rebus multum inter se differentibus, perpetuum esse præceptum temporis esse possit: sed intueri potius oportere ipsas accessiones (cujusque morbi singulares & multum differentes mutationes) & ex his conjectare quid usui fiet*. Quarum mutationum, omniumque naturæ adversus morbum motuum, usque adeo sollicitus fuit Asclepiades observator, ut (eodem Celso teste) professus febre ipsa præcipue se ad remedium uti, ne turbaretur

Lib. 2. de D.
D. cap. 7.

Lib. de Dis-
sect. uter.
cap. 5.

Comment.
de Articulis.
69.

Lib. I. de
Nat. Facult.
Cap. 14.

Lib. III. de
Medicin.
Cap. IV. p.
III. & seqq.

ap. Galen. de
Ven. sect.
adv. Erasistr.

Præfat. ad
Lib. de
Comp. Med.

ap. Cœl. Au-
rel. Acut.
Lib. I. Cap.
14.

hinc futura Crîsis, plane sustulerit frivolum medicamentorum
usum, & medicorum his satagentium conatus, ceu *mortis*, ut
vocat, *meditationem* condemnaverit. Nam omnia medi-
camenta, quod passim criminatur Galenus, Asclepiadem non
fuisse adversatum, sed iis & variis & efficacissimis fuisse pru-
denter usum, ex Scribonio Largo, itidem Romano scri-
ptore, liquido constat. *Eυναργία* autem s. *temporis oppor-
tunitatem* (medicinæ animam) quam *magnificam* appel-
lat Asclepiades, ut confectaretur, sicque mature, una cum
motibus naturæ, τὰ δέοντα ageret, pluribus horis, immo
urgente necessitate, totis diebus, ut ex Celso colligere est,
uni ægroto adsidebat. Hocine est *natura judicia contemnere?*
an magis, ut nemo negaverit, ea & optime cognoscere, &
cognitis optima ratione consulere? Utinam triviales *Practici*
exemplum hinc, quantum licet, caperent, & saltem frivolum
receptismum, ex Galenismo male natum, hinc dedicerent. Sed,
ut animadvertit noster Celsus, *qui quæstui serviunt, quoniam is
major ex populo est, libenter amplectuntur ea præcepta, quæ se-
dutilitatem non exigunt; uti in ipsa hac re. &c.* Accessit sen-
tentia Asclepiadis ipse ille *A. CORNEL. CELSUS*, ingenue
& cultioris *Medicinæ perenne decus*; qui, ut solet libere &
ingenue decernere de placitis decessorum, utpote nullius ad-
dictus sectæ (ut vel hinc dignam Patricia gente Cornelia pro-
geniem, non utique vernulam, agnoscas) sic post exquisitissi-
mum judicium super decretis Hippocratis de diebus Crîsi-
mis, in hanc finit sententiam: *Adeo apparet, quacumque
ratione ad numerum (dierum criticorum) respexerimus, ni-
hil rationis, sub illo quidem Authore, reperiri. Verum in
his quidem antiquos tunc celebres admodum Pythagorici numeri
fefellerunt.*

XXVIII.

Habemus ergo, Celso judice, male Pythagorizantem
Hippocratem; hoc est, ordinare conantem dierum Criticorum
per septenarios periodum, ex male, ut arbitror, intellecta
Pythagoræ de numeris doctrina, arcana & symbolica. Quod
quidem,

quidem, ut video, non agnoverunt, nedum ut concedant, qui, ex limpido Naturæ fonte nusquam non pure fluere Hippocratis doctrinam, persuasum habent. Hinc & cum Gale- Lib. de D.D.
no, qui pro deridiculo exponit Pythagoristarum fabellas, nume- 3. Cap. II.
rorum ad inducendos dies Crisimos efficaciam, quam negant, ipsi passim acriter confutant. At vero cum imparatam ab aliis & firmis fundamentis, quin immo prorsus male conceptam omnem dierum Criticorum doctrinam, (secus ac creditum pariter hucusque est) evidenter, ut confido, hætenus vidimus: quidni accedimus CELSO? Viro in omni cultioris disciplinæ genere versatissimo; hinc & istarum rerum, si quisquam alius, idoneo arbitro. Vel potius, nacti in Tali Viro exemplum, quidni ipsimet scripta Hippocratis inspicimus nostriis, hoc est, auctoritatis præjudicio & servitute emancipatis oculis? & libera hinc inquisitione arbitramur ipsi? En indicium: *Septenario numero sic circumscribi omnem hominis vitam, placet Hippocrati Lib. de Princip. ut intra septimum diem humor seminalis utero conceptus, conformetur in rudimenta omnium partium, quæ corpus habere debeat.* Vel, ut arguta- In Soma.
tur, ex nostro Hippocrate, Macrobius, *semine semel intra for- Scipion. Lib.*
maudi hominis monetam locato, hoc primum artifex molitur I. Cap. VI.
natura, ut die septimo folliculum geminum circumdet humori, ex membrana tam tenui, qualis in ovo ab exteriore testa clauditur, & intra se claudit liquorem. Hancque septenarii numeri Vim adeo extollit Hippocrates, ut plane τῆς φύσεως ἀνάγκη, natura necessitatem appellet. Lib. cit. sub fin. Item Septimum diem inter alios maxime insignem esse, hunc multum in morbis, multum in foetibus posse, perhibet Lib. de septimest. part. Hinc foetuum conceptiones & abortiones & partitūdines, eodem tempore (ἡγίεθαι) judicari; quo & morbi & sanitas & mors cunctis mortalibus contingunt. Hinc septimum mensem in gravidis perfectionis initium foetibus adferre; atque adeo septimo mense natum vera ratione in lucem prodire & vitalem esse: habere
enim

enim (NB.) rationem & numerum exacte ad septimanas respondentem; octavo autem mense natum, nullum unquam vixisse. Eod. Libr. de Princip. Post hæc denique, & in eundem sensum alia, concludit, esse ergo (ex una septenarii potentia) eandem rationem dierum Criticorum. Ergo & animadvertere jubet *Medicum, si quidem recte de agrotorum salute conjectare velit, ut omnes quidem dies in contemplationem adhibeat, ex paribus vero decimum quartum & vigesimum octavum, & quadragessimum secundum. Hic enim terminus, ait, pro harmonie ratione, & integer & perfectus numerus a QUIBUSDAM ponitur &c.* Quæ præter hæc adducuntur ab Hippocrate, non est cur moremur; quis enim non aperte videt, qui fuerit in historia Philosophorum antiquorum vel perfunctorie versatus, illos QUOSDAM Hippocratis, esse ipsos illos Galeno adeo derisos Pythagoristas? Dubitas? consule Commentatores in Arithmeticam Pythagoream. Nobis ad manus fuerunt *Jamblichus in Nicomachum Gerasenum*, & in eundem *Joach. Camerarii explanationes*. Et quem Salmasius commendat, ceu præcipue insignem, *Proclus in Hesiodum περί ημερών*. Qui sane Commentatores harmonicas illas, quas heic innuit Hippocrates, numerorum rationes, per septenarios procedentes; ita exputatas, & septenarii numeri miram, & tantum non omnipotentem Virtutem, ita dimensam Tibi dabunt, ut stupescas. Hinc deprome, qui talia amas, quantum lubet; nobis, qui sumus ab his deliciis paullo alieniores, indicium fecisse satis est.

Diarrib. de
Ann. Cli-
maet.

XXIX.

In Somn.
Scip. l. c.
Lib. de Die
Natali.

Quæ ex his Philosophematis est concepta opinio, de admiranda, & per omnem rerum naturam diffusa, septenarii numeri potentia, hinc emanavit ad omnis generis scriptores; eam mire, pro suo quisque genio, ebuccinantes. V. gr. Macrobio est hic numerus, qui hominem concipi, formari, edi, vivere, ali, ac per omnes etatum gradus tradi senectæ, atque omnino constare facit. Censorino habetur is, quo tota humana vita finitur. Quin immo, quod mireris antiquo

Jcto

Icto Julio Paulo, hilogi fuere adeo probati, ut causam, (seu, si fas
 est dicere, fundamentum) Legis hinc extricarit: *Septimo*, in-
 quit *menſe natus matri prodeſt*. Ratio enim Pythagorei numeri
hoc videtur admittere, ut aut ſeptimo pleno, aut decimo men-
ſe partus maturior videatur. Ergo miſella mater, effundens
 inutilem offam, menſe octavo: numero infaſto, ſcilicet.
 Quod ſi vero hæc, & quæcunque alia de numero ſeptenario
 ſpecioſe ubique enarrantur, coram experientiæ ſiſtantur tribunali,
 cauſa omnino cadere creditam illam efficaciam mirificentiſſimam
 deprehendimus: uti quidem hodiernis Phyſiologis, ſuis expe-
 rimentis arcanorum naturæ intimiorem conſcientiam adeptis,
 eſt perſpectiſſimum. Non eſt igitur, quod in logis illis re-
 futandis nos diffundamus per omnes illas ſpecies, quas cumu-
 late & indigeſte, ſatura quaſi lance, refert Macrobius l. c.
 Satis ſit paucis, & velut in tranſitu animadvertere, vel ea ipſa,
 quæ ex noſtro Hippocrate protulit, ceu indubitata, omnino
 ſecus ſe habere. Videlicet de perfectione genitura, quæ fiat
 intra ſeptimum diem: & foetus maturitate intra ſeptimum
 menſem potiore, quam ſit octavo. Ad primum enim quod
 attinet, liquido & ipſa adeo autopſia anatomica conſtat, ovula
 (ſ. illos Macrobi ſolliculos) ex quibus omne animalium genus
 naſcitur, non demum formari aut genitura masculina, aut
 ſeminum utriuſque parentis coalitu: ſed illa ipſa ovula eſſe ſe-
 xui ſcæmineo connata, eaque ſenſim cum ætate pubeſcente ad
 juſtam maturitatem pervenire; atque, ut luculenta experi-
 menta Malpighiana docent, continere non merum humorem
 natalem; ſed una cum hoc, prima omnium partium corporis
 rudimenta, ſeu ſtamina: non ſecus ac ſemina Vegetabilium,
 ideam ſ. formam integræ plantæ. Sic ut non ſint ex liquore
 genitali masculino, ceu ex aliqua maſſa, conficiendæ partes
 corporis (ut opinatus eſt, cum Hippocrate, Macrobius) ſed iſtæ
 in ovulo jam ante imprægnationem præſentes, aura ſolum vi-
 tali ſeminis ſuſcitandæ, explicandæ, vivificandæ. Partum ſe-
 ptimo-

ptimestrem, æque ac *ottimestrem*, esse præter solennem naturæ ordinem, & veluti præcipitari, aut violenta qualicunque affectione, aut defectu nutrimenti, nostra ætate (in Foro quidem Medicorum) extra controversiam est. Immo indicat talium foetuum imperfectionem ipsa corpusculi *ἐξίς*; utpote cutis nimia teneritudine & mollitie quasi fluens, minusque consistens, ungues nondum durati, sed humidam membranulam, qualis est ovi interior pellicula, referentes, item vigilandi impotentia &c. Porro, exemplis quidem constat, *ottimestres* non minus, quam *septimestres*, fuisse vitales; at & hoc non secius constat, rarius utrisque hanc benignam sortem evenire, sed plerisque non nisi vitæ usuram dari brevissimam. Sic tamen ut *ottimestris*, ceu corporaturâ & hinc vivacitate (ceteris paribus) prævalidior, *septimestri* magis vitalis, uti est, sic haberi jure possit & debeat. Quod quidem C. Drelincurtius, singulari de partu *ottimestri* diatriba, jamdudum liquidissime demonstravit. Adeo ut veritati hætenus congrua sit & Plinii Observatio: *Translatitium*, inquit, in *Aegypto* est, & *octavo* (mense) gigni: jam quidem & in *Italia* tales partus esse vitales, contra *priscorum* opiniones.

Hist Nat.
Lib. VII.
Cap. 5.

XXX.

Cum igitur his veluti palmariis pro septenario numero argumentis nil quidquam efficitur, facile est arbitrato, quid statuendum de reliquis: nempe de illis insignibus corporis, sanitatis, virium mutationibus, quæ perhibentur contingere ad periodum *septenorum* sive *mensium*, in ætate infantili, sive *annorum*, in reliquis ætatibus. Evidens enim est, singula hæc non ita arcte his statis septenarii terminis circumscribi, quin habeant magnam omnino latitudinem & disparilitatem, pro varia, eaque omnino diversa ratione temperamenti, & climatis, & vitæ generis &c. adeoque ad *ἀνάγκην* (necessitatem statam) *septenarii numeri* ea inepte & frivole referri. Verum quid istis tricis diutius inhæremus? Ipse Pythagoras causam *Physicam* *numeri* non adscripsit; nec potuit, cum sint, ut norunt vel *Logicorum* pueri, non substantiæ non res, sed

sed notiones tantum secundæ. Neque is ipse, tot rerum disparatarum & diversarum seriem seu effectus, quot a diversa causarum naturalium actione & reactione fiunt, & varia, pro varietate causæ, periodo procedunt, unius numeri termino temere alligavit, nec una eaque impertinente decempeda est emensus. Sed potius, ut ex *Porphyrio*, sive mavis *Malcho De Vita Pythag.* 6. 48. constat, *numerus* Pythagoras doctrinæ causâ usus est, fere ut solent suis sive figuris, sive notis & signis, qui Geometriam & 4. edit. aut Algebram docent vel plane ut symbolis hieroglyphicis: Kuster. quibus numeris discipulos interioris admissionis (tradita Conf. Plu- prius clave) participes faciebat arcanae suæ (undecun- tarch. de Isid. que demum, sive ab Ægyptiis, sive ab ipsis Judæis hau- & Usit. Opp. itæ) doctrinæ; reliquos vero gregarios (denegata illa clave) T. II. f. m. eam celabat. Hinc & Jamblichus: *Ipse Pythagoras pleraque* De Vit. Py- *eorum, quæ traduntur occuluit; ut sincere quidem docti* (γνησίως thag. Cap 34 Pythagorei, esoterici) *sensum inde perspicuum: ceteri vero in* & 35. *mediis acroamatibus versantes* (exoterici, acusmatici, & Py- thagoristæ proprie dicti) *instar Tantalii Homerici, nullum alium inde fructum, quam dolorem perciperent; paucis duntaxat ex- ceptis, quæ exilis rarique igniculi instar quibusdam inhaeserunt.* Num itaque miramur adhuc, nostrum Hippocratem *numeros Pythagoricos fefellisse?*

Possemus igitur, cum dies Critici nusquam non causâ XXXI. cadant, jure finire sententiam; nisi eam paullulum retineret in suspenso, jactata *Galenii experientia*, ad quam passim & anti- quiores & hodierni desperatæ causæ Patroni ultimo provo- Lib. II. de cant. *Ego inquit Galenus, in una æstate plures quam quadrin-* DD. cap. 7. *gentos homines, acute agrotantes, universos vel septimo vel no- no die Crisin habuisse conspexi &c.* Ohe quadringentos! Forte numero, ut solent Græci, rotundo & indefinito, ut alibi *my- riades*. Quod tamen non urgemus. Immo & hoc alii vide- rint, experientiæ Galeni, patrocinantis ambitiose propriæ caus- sæ, quantum tribuant. Qualiscunque demum hæc sit, mihi perspectum est, eam non congruere cum sententia Hippocra- tis: quam tamen suis experimentis adsertum ire, & ipse vide- ri vult,

si vult, & passim creditur. Dicam (ut sit tandem *finitus Ores*) paucis Hippocrates & Galenus numerant dies omnino diversimode. Hippocrates sumit pro primo morbi die id temporis spatium indefinitum, quantulumcunque demum, quod a primo morbi insultu ad solis occasum restat: sic, ut quamvis duabus demum horis ante occasum solis morbus ingruat, tamen primus morbi dies occidente sole (ex sententia Hippocratis) finiatur: atque adeo quæ subsequenter eveniunt, non referantur ad diem primum, sed secundum. Quod quidem operosissime, contra Galenicos, demonstravit *commentator* vere *Hippocraticus*. Galenus e contrario omnes morbi dies æqualiter numerat, & definit spatio XXIV. horarum. Nec potuit aliter, si quidem consultum cuperet suæ hypothesei, Astrologicæ. Ergo a prima hora, qua manifeste invadere cœpit morbus, diem numerare inchoans, non nisi elapsis a prima invasione horis XXIV. primi diei finem, & secundi initium constituit. Hinc sane apertum est, non potuisse non fieri sapissime, ut, qui fuisset Hippocrati dies septimus & Criticus Princeps, is idem dies, ex Galenica computatione, fuerit sextus, omnium pessimus & tyrannus, scilicet: & contra &c. Porro ex loco Hippocratis, quo perhibentur *mulieribus quoque juxta eandem rationem* (computandi dies per quaterniones & septenarios) *Crises fieri a partu*, concludit Galenus, & docet dierum Criticorum computationem non esse inchoandam a morbi, qui partui supervenit, initio, sed ab ipso partu; contra clarum hujus loci sensum, ut liquido demonstravit idem Martianus, immo contra institutum ipsius Hippocratis, ut cuivis est in promptu colligere, ex tribus luculentis historiis mulierum ex partu ægrotantium Libr. Epidem. I. Sect. 3. quibus historiis dierum fit enumeratio a morbi invasione, non, ut vult Galenus, a partu; ne quidem, quod accidisse illarum mulierum uni, Epicratis uxori, memoratur, ne quidem dico, si postridie a partu morbus ingruat: quod in primis contra Galeni defensores advertendum est. Hinc, forte non injuriâ, concludit Martianus, *summa esse admiratione dignos tot Viros insignes, qui, Galeni au-*
etornate

Prosp. Mar-
 tian, in Hip-
 poc. f. m. 313.
 & seqq

Lib. 2. de
 Crisib. Cap.
 2. & alibi
 passim.

Progn. Lib. 3

Comment.
 super hoc
 loc.

L. c. f. 386.

Auritate obcæcati, in tanta claritate caligaverunt. Et nos, ceu in re confessa, manifeste deprehendimus, Galenum in hac doctrina, ut fere omnibus suis commentis, sic & suis experimentis usque adeo non commodare decretis Hippocratis, ut ea magis, destituat & evertat. Propterea censemus, nostro, ut confidimus, jure, doctrinam universam de diebus Criticis male natam, frivole tot seculis jactatam, & quasi per manus traditam, nulla unquam constitisse vera demonstratione, sed mera & vana opinione, concepta ex præjudicio auctoritatis, & levi hinc credulitate, esse susceptam, & in hunc usq; diem propagatam.

Equidem (quod forte juvabit epimetri loco addidisse) XXXII.

Interpretes & Commentatores præcipui, reliqui gregis veluti duces, indissolubiles in doctrina de diebus Criticis nodos, paralogismos, *ἀνυσασίας*, (quæ hætenus investigata confutavimus) aut attingunt, ut reperio, dumtaxat leviter, & male facta gratia componunt; aut, quo sunt erga venerandos salutaris doctrinæ Parentes affectu, prorsus dissimulant, & mantelo quasi nuditatem tegunt. De qua quidem, quam vocant, verecundia, ut lubet, alii statuerint. Mihi videtur esse perspectum, eam semper obfuisse plurimum artis profectui. Atque adeo illos quidem inepte religiosos, fuisse in omnem posteritatem inofficiosos, hinc & injurios. Nimium, cheu! evidenti argumento sunt vulgata ad huc dum systemata. Quantum usque quaque, ex traditionibus sine examine admissis, & frivole creditis, est & perstat tricarum, offuciarum, assaniarum! unde, dum impeditur, obfuscatur, interpolatur quidquid reliquum est doctrinæ bonæ frugis, non potest non *ars*, per se *longa*, fieri Tironibus & perplexa & difficillima. Cuncta hæc tollere, plus quam Herculeus fuerit labor; certe non unus hominis; nedum obscuris dare lucem, perficere desiderata. Ergo bonum factum! quod, mutatis rerum vicibus, solertia & sagacia nostræ ætatis ingenia, non, ut olim, conjurent in decreta Hippocratis & Galeni: utique hominum, communis nobiscum sortis, hoc est, errare, labi, falli naturâ proclivium; sed id potius conspirante studio agant, ut liberi ab omni,
sive

sive Medicorum sive Philosophorum, secta, iis mediis artem Medicam colant, quibus & unice potest perfici: quæ sunt, tum assidua operum & phaenomenorum naturæ observatio, & indagatio per *experimenta mechanico-mathematica, Anatomica, Chemica*, tum præcipue *morborum*, in suas *proprias species* digestorum *historia* certa; & hinc deducta, hinc statuminata *Theoria* vere *Experimentalis*. Hinc judicetur, hinc stet aut cadat, quidquid antiquorum, quidquid novorum est inventorum, commentorum, fabularum. Nobis, qui connitimur iisdem liberis vestigiis insistere, satis erit, (si obstat nostra imbecillitas, quo minus queamus æquis passibus & ultra) saltem eatenus progredi, ut ab incertis & inutilibus secernamus certa & utilia; iisque, pro nostra copia, hominum commodis consulamus. Eo quidem animo damus, quæ hæcenus de Naturæ Medicina sumus commentati, generali complexu, hinc ob brevitem involuta & indigesta: at D.D. olim diducenda & perficienda. Eo animo, ut sane in neminem injurio, sic & nemini vadato, libere est contradietorum Criticorum adsertores disceptatum: prolixitate forte Lectori minus grata, at non evitanda, cum quidem ab ultima stirpe omnis fabulæ auctoritas erat investiganda, & refellenda. Quod si sic, ut confidimus & sumus utique connisi, effecimus, apertum tandem erit, doctrinam de diebus Criticis, quæ *μετὰ πολλὰς φαντασίας* systemata usque adhuc occupavit, ceu destitutam omni idoneo fundamento, esse explodendam, & eo loco habendam, quo *Astrologorum Genethliacorum*, quibus quæstus est ex stulta aliorum credulitate, *Anni Climacterici*. Quamobrem vero & Galenus olim, præ reliquis quibuscum vixit Medicis, dierum istorum fastorum nefastorum jactaverit quasi scientiam & sollicitam observationem, & nostræ ætatis Medici plures (quibus illorum vanitas forte non est ignota) paria cum eo facere nondum desistant, apertius numquam dixero, nisi omnino invitus, & quasi laceffitus. Ut enim (quod scio) *sunt multa in Medicina, quæ neque dici neque scribi possunt*, sic forte multo plura sunt, quæ dici & scribi, iis minime expedit TANTUM!

P Ag. 7. l. 20. leg. *ἀνέκτου*. p. 12. l. 20. *corum*. p. 15. l. 29. *redintegratur*. p. 17. l. 30. *facto*. p. 19. l. 2. *sphacelo*. p. 29. l. 21. *fideliter*. p. 30. l. 31. *Alii*. Adde ad p. 40. l. 19. *Vel potius, una cum Proclo a D. Heinsio a. 1603. editus Protospatharius; qui multo planius, quam ipse ille, quem Salmasius commendat,*